

清

史

稿

清史稿

列傳三十

沙爾虎達

安子 巴圖魯

劉之源

吳守憲

巴山

張大猷

喀喀木

梁化鳳

子 釐

劉芳名

胡有陞

楊名高

劉仲光 翁 翁

沙爾虎達瓜爾佳氏其先蘇完部人居虎爾哈太祖時從其父桂勒赫來歸授牛叢額真天命初從伐瓦爾喀部有功授世職備禦天聰元年太宗自將伐明攻大凌河圍錦州沙爾虎達以噶布什賢章京從屢戰輒勝三年復從伐明拔遵化薄明都沙爾虎達戰郭外敗明兵進世職游擊自是數奉命與噶布什賢章京勞薩等率游騎入明邊往來松山杏山間獲明邏卒十八及牙將爲邏卒監者並得牲畜器械甚夥大凌河城下明將祖大壽降既復入錦州爲明守上遣諸將略錦州使沙爾虎達懸書十三站山坡諭大壽九年與白奇超哈將領巴蘭奇等徇黑龍江加半個前程冬復略錦州還獻俘命分賚將士崇德元年

從伐朝鮮破敵南漢山城二年列議政大臣甲喇額真丹岱阿爾津等如土默特互市上慮明兵要諸途命沙爾虎達帥師詣歸化城護行三年與噶布什賢噶喇依昂邦吳拜將八十人行邊至紅山口遇明兵斬裨將二擊走明騎兵自羅文峪至者奪其蠶得馬四十又破明步兵自密雲至者斬百餘級四年上自將伐明沙爾虎達將噶布什賢兵自義州向錦州復將土默特兵二百人入寧遠北境與甲喇額真蘇爾德鄂碩布丹爲伏以數騎致明師明師堅壁不應乃掠其探薪者以歸五年進世職二等甲喇章京六年三月從睿親王多爾袞圍錦州坐從王令離城遠駐當奪職籍家產之半上命罰緩八月遷噶布什賢噶喇依昂邦上自將禦洪承疇部分諸將擊敵賜沙爾虎達馬使將所部屯高橋東界諭曰敵敗當自杏山西臺截大道躡擊之母使入城且誠之曰汝平日行不逮言今當自勉既戰明師敗沙爾虎達違節制縱潰兵二百餘入城上命繫而問之沙爾虎達稽首對曰殺臣祇一死宥當效命上乃宥之降授甲喇額真七年與珠瑪喇率師伐虎爾哈部降喀爾喀木等十七人戶千餘得馬輿牲畜

師還宴勞資布帛有差順治元年伐庫爾喀伐黑龍江皆有功復從擊李自成破潼關二年從攻江甯下杭州進世職一等甲喇章京四年授梅勒額眞帥師屯東昌討平土寇丁維岳張堯中加半箇前程五年從討江西叛將金聲桓遷巴牙喇額眞復爲議政大臣六年定河間土寇七年調鎮藍旗滿洲梅勒額眞累進一等阿思哈尼哈番九年七月命帥師駐防寧古塔十年擢固山額眞仍留鎮賜冠服鞍馬十五年七月俄羅斯寇邊沙爾虎達擊之走多所俘馘十六年卒諡襄壯以其子巴海襲巴海初以牛彘額眞事世祖累遷秘書院侍讀學士既襲世職上諭吏部曰寧古塔邊地沙爾虎達駐防久得人心巴海勤慎堪代其父授寧古塔總管十七年俄羅斯復寇邊巴海與梅勒章京尼哈里等帥師至黑龍江松花江交匯處調敵在飛牙喀西境卽疾趨使犬部界分部舟師潛伏江隈俄羅斯人以舟至伏起合擊我師有五舟戰不利旣俄羅斯人敗棄舟走巴海遂戰斬六十餘級俄羅斯人入水死者甚衆得其舟槍炮若他械因降飛牙喀百二十餘戶敍功加拖沙喇哈番明年以巴海奏捷諱未言有五

舟戰不利盡削原襲及功加世職康熙元年改設黑龍江將軍仍以命巴海十年上東巡詣盛京巴海朝行在上問寧古塔及瓦爾喀虎爾哈諸部風俗巴海具以對諭曰朕初聞爾能今侍左右益知爾矣飛牙喀赫哲雖服我然其性暴戾當迪以教化俄羅斯尤當慎防訓練士馬整備器械毋墮其狡謀爾膺邊方重任當龜勉報知遇邊外有墨爾哲之族累世輸貢巴海招之降其長扎努喀布克托等請內徙巴海請徙置寧古塔近地置佐領四十以授扎努喀布克托及其族屬分領其衆號爲新滿洲十三年冬巴海率諸佐領入覲上錫予有差賜巴海黑狐裘貂朝衣各一襲十七年敕獎巴海及副都統安珠瑚撫輯新滿洲有勞予世職一等阿達哈哈番兼拖沙喇哈番二十一年巴海疏言官兵捕采獲者當視所得多寡行賞上爲下部議并誠非采獲者毋妄捕是歲上復東巡詣盛京幸吉林察官兵勞苦旣還京師諭巴海罷採鷹捕鯨鯉諸役二十二

年以報田禾歉收不實部議奪官削世職上猶念巴海撫輯新滿洲有勞命罷將軍降二等阿達哈哈番二十三年授鑲藍旗蒙古都統列議政大臣三十五

年卒子四格襲職安珠瑚瓜爾佳氏滿洲正黃旗人先世居蘇完父阿喇穆任牛彖額真順治元年從入關擊李自成戰死授世職牛個前程安珠瑚襲職遇恩詔累進三等阿達哈哈番擢甲喇額真兼刑部郎中從大將軍伊爾德攻舟山從將軍濟什哈討萊州土寇于七皆有功康熙六年授寧古塔副都統十五年增設吉林烏喇副都統以命安珠瑚佐巴海撫新滿洲進世職如巴海十七年擢盛京將軍二十一年上東巡見邊界多戰骨暴露諭安珠瑚徧察收瘞二十二年以疾乞休上賈安珠瑚失職奪官發吉林烏拉効力二十四年授索倫總管二十五年卒安珠瑚入對嘗言所轄士兵皆藐視之上知其庸懦其卒命削其世職

劉之源漢軍鑲黃旗人天聰九年授甲喇額真崇德五年從上伐明攻錦州距城東五里發砲墮其臺復列砲城北擊瞭馬臺殪明兵尋代馬光遠爲正黃鑲黃二旗漢軍固山額真六年從睿親王多爾袞圍松山發砲墮臺四獲明將王希賢崔定國楊重鎮等又斬裨將三七年從鄭親王濟爾哈朗圍塔山列砲城

西毀其垣二十餘丈。殲城兵墮杏山城北。燬又擊毀其垣。城兵懼乃出降。授世職二等甲喇章京。分設漢軍八旗之源。仍領鎮黃旗。八年從鄭親王攻克中後所斬明將吳良弼。王國安等。進攻前屯衛。發礮墮其城。進世職一等順治元年從入關。命與固山額真李國翰剿定畿南。餘寇復從固山額真葉臣等西征。克太原。又與固山額真巴哈納自汾州逐寇至平陽。斬賊四千餘。山西寇始盡。師還。優賚二年。從順承郡王勒克德渾下湖廣。討李自成。與國翰合師破應山。降將馬進忠。復叛。與固山額真金礪擊敗之。武昌得舟六十餘。遂徇湖北。五年授定南將軍。從鄭親王再下湖廣。六年攻湘潭。明總督何騰蛟分三隊出戰之源。分兵應之。敗明兵。克其城。獲騰蛟夜督兵。遂進忠。平明洲。其壘復進。克寶慶。並破南山坡九壘。斬明將馬有志。胡進玉等。進忠跳而免。又擊破明將袁宗第於洪江。王永強於便水驛。敍功。遇恩詔。世職累進一等阿哈尼哈。番兼拖沙喇哈。番八年與金礪駐防杭州。明大學士張肯堂與其將阮進張名振擁魯王以海屯舟山之源。與總督陳錦總兵田雄合師攻之。破明兵於橫水洋。獲進逼螺頭。

門肯堂城守十餘日師以雲梯登肯堂及魯王諸臣李向中吳鍾樹朱承佑等縱火自焚死名振以魯王遁三盤島之源遣總兵馬進寶等追擊破之焚其積聚復敗之於沙埕收各嶼戶口八千五百餘悉令歸農論功進三等精奇尼哈番十六年八月授鎮海大將軍駐防鎮江疏言京口百川匯流江南財賦自此輓運北輸近因鄭成功入犯幾至橫截運道宜先練習水師以資防禦海策有三出海會哨勿使入江上也循塘拒敵勿使登陸中也列陳備兵勿使近城斯下矣顧練水師當先造船火器水手舵工百無一備何以禦賊上敕兵部下總督耶廷佐製備十七年疏言京口水師造船二百募水手舵工八千餘一時難以集事沿海民有雙桅沙船造作堅固其人熟於洋面水道請查驗船堪用者予收用船戶給以糧餉舊設戰船低小不必修補邊海砲臺烽墩橋路請敕督撫下沿海州縣修葺高廣下兵部並從之尋得成功遣諜與提督馬逢知關通狀疏聞命侍郎尼滿會之源勒賈達知坐誅康熙三年召還京仍任都統四年以病乞休加太子太保致仕以其子光代爲都統繫拜得罪之源光坐黨附

奪官論死上命寬之之源尋卒妻胡叩關訴之源功罪足相當詔復官并予三等精奇尼哈番仍以光襲三傳降襲三等阿思哈尼哈番乾隆初定封三等男吳守進漢軍正紅旗人初籍遼陽太祖時來歸從征伐有勞授世職游擊天聰五年授戶部承政八年考滿進世職一等甲喇章京時始設漢軍世管牛彙額真命守進兼任崇德三年改左參政四年坐昧論罪至死命貸之削世職解參政籍其家之牛仍攝正紅旗漢軍梅勒額真旋真除六年從睿親王多爾袞武英郡王阿濟格攻錦州守進發砲克塔山四臺獲明將王希賢崔定國等多所斬馘七年擢本旗固山額真率師攻松山杏山明兵屯呂洪山口與固山額真金礦擊破之明兵保杏山側二臺復與固山額真劉之源擊破之遂拔杏山尋命與梅勒額真馬光輝等詣錦州督鑄砲八年從攻甯遠取中後所前屯衛順治元年從入關復授世職二等甲喇章京從固山額真葉臣徇山西克太原復從豫親王自自成下江南敗明師克揚州江陰復進破嘉興敍功進一等四年授定西將軍駐漢中五年卒子國柄襲從征湖廣官梅勒額真加世職拖沙

喇哈番

巴山瓜爾佳氏滿洲鎮黃旗人世居哈達祖巴岱國初率衆來歸授世管牛彖額眞再傳至巴山天聰五年從太宗伐明圍大凌河城兵出戰梅勒額眞屯布祿牛彖額眞郎格等戰沒巴山馳入陳以其尸還六年從伐察哈爾其部人竄入大同往取之師還巴山與承政圖爾格殿明兵追襲設伏邀擊斬馘甚衆八年授世職牛彖章京尋擢甲喇額眞崇德元年從上伐朝鮮與甲喇額眞屯泰等先衆破敵三年兼任工部理事官從貝勒岳託伐明自塘子嶺入邊薄明都擊敗明太監馮永盛兵攻鉅鹿率所部以雲梯先登克之加牛個前程五年與承政薩穆什喀索海等伐虎爾哈部攻掛喇爾屯七年從奉國將軍巴布泰率師駐錦州順治元年從入關督所部步兵擊敗李自成擢工部侍郎進世職三等阿達哈哈番二年授梅勒額眞鎮守江甯三年命總管江甯駐防滿洲兵特置總督糧儲兼理錢法駐江甯以協領鄂屯兼任加戶部侍郎以重其事時江北諸山寨並起號爲明守江甯民有謀爲應者巴山嗣知之捕斬三十人未幾

明潞安王誼石以二萬人分三道攻江寧巴山會招撫大學士洪承疇等督兵禦之誼石敗走語詳承疇傳明故左通政嘉定侯嗣竹以二年死難四年其子元潞通表魯王以海取敕書及其將黃斌卿致承疇書以歸柘林游擊陳可得之有內殺巴張二將語指巴山及提督張大猷也事聞上以敵謀設閒詔慰承疇而諭獎巴山及大猷嚴察亂萌公忠盡職六年江南總督馬國柱討六安山寇巴山及大猷以師會斬其渠張福賓諸寨悉平進三等阿思哈尼哈番是歲裁總督糧儲錢法不復置九年將軍金礦討鄭成功請益師部議調江寧駐防兵二百鄂屯與理事官額赫納烏庫理率以行政海澄成功兵劫我軍砲鄂屯與額赫納擊却之成功兵十餘萬逆戰鄂屯督兵縱擊成功兵退斷橋鄂屯與烏庫理策馬逕渡成功兵潰破其壘數十降數千人尋召巴山還京以喀喀木代十一年復錄江寧平寇功進世職二等康熙十二年卒子舒恕襲世職從大學士圖海討王輔臣次平涼城北虎山整擊敗輔臣兵復從都統穆占討吳三桂擊敗三桂兵於松滋進圍雲南屢敗吳世璠將胡國柄劉圮龍黃明等又困

其將馬寶巴養元等於烏木山論功進世職一等卒子長清改襲一等阿達哈哈番張大猷漢軍鑲黃旗人初籍遼陽太祖克遼陽大猷以千總自廣寧來降授牛彖額真天聰初明邊將遣謀招我新附之衆大猷發其事太宗嘉之予世職游擊崇德三年授刑部理事官尋擢漢軍梅勒額真四年更定漢軍旗制授鑲黃旗梅勒額真五年從睿親王多爾袞圍錦州率本旗兵攻五里臺及涼馬山馬家湖皆下又克金塔口臺六年從鄭親王濟爾哈朗圍錦州明騎兵自松山至謀奪砲大猷擊卻之復與固山額真劉之源等攻克塔山杏山及附近諸臺論功進二等甲喇章京七年遷兵部叅政十月從貝勒阿巴泰伐明築橋渾河濟師擊破明總督范阿衡軍八年從攻甯遠取中後所前屯衛進世職一等順治元年從固山額真葉臣徇山西克太原與固山額真李國翰撫定諸郡縣二年師定江南與固山額真吳守進下浙江次石門明兵自杭州夜來襲却之還克嘉興三年命與巴山率兵鎮守江寧總管漢軍及綠旗兵旋授提督江南總兵官論功進世職三等梅勒章京六年同討張福寶總督馬國柱奏大猷身

先士卒履險摧鋒功第一進世職三等精奇尼哈番九年卒三傳降襲三等阿思哈尼番乾隆初定封三等男

喀喀木薩哈爾察氏滿洲鑲黃旗人先世居烏喇部父塘阿禮富太祖時率百人來歸授牛象額真從伐遼東有功予世職游擊從伐瓦爾喀射熊爲所傷卒喀喀木嗣領牛象崇德三年授吏部理事官五年從伐虎爾喀部敵據柵拒戰喀喀木督兵破柵斬級二百俘一百三十七年從伐明攻松山本旗將領失律未察舉降世職牛象章京八年擢吏部參政順治元年著梅勒額真從入關加半個前程尋改侍郎四年復世職三等甲喇章京郎陽總兵王光恩坐事逮繫其弟光泰叛據郎陽提督孫定遼戰死勢甚張上命喀喀木率兵討之師將薄郎陽光泰遁走喀喀木與副將王平率師逐捕戰房縣斬級千餘光泰走四川喀喀木駐軍郎陽五年金聲桓自江西窺湖廣總督羅繼錦疏請留喀喀木駐荊州六年召還七年授鑲黃旗梅勒額真世職累進二等阿思哈尼哈番八年命與固山額真噶達渾等率兵討蒙古鄂爾多斯部長多爾濟九年師出甯夏

至賀蘭山擊斬多爾濟并殲其部衆俘其餘以歸得馬駝數百牛千餘羊萬餘
尋命代巴山爲鎮守江甯總管十年明將李定國兵犯廣東潮州總兵郝尙久
叛應之授喀喀木靖南將軍率師會靖南王耿繼茂討尙久圍逾月督兵以雲
梯登尙久入井死潮州及旁近州縣皆定還駐江寧十六年鄭成功大舉入犯
破鎮江復陷瓜洲沂江上喀喀木與總督卽廷佐提督管效忠謀禦敵檄總兵
梁化鳳赴援會梅勒額眞噶褚哈瑪爾賽自貴州旋師循江東道江寧入城同
守喀喀木曰賊勢盛宜乘其未集先擊之簡精銳逆擊成功前軍爲少却得舟
二十餘俄成功兵大至連營八十有三舟蔽江喀喀木晝夜防守化鳳援兵至
乃議使綠旗兵先出戰化鳳出儀鳳門效忠出鍾阜門夾擊破成功兵獲其將
余新等明日喀喀木與噶褚哈瑪爾賽督兵出神策門成功兵據白土山列陳
乃分兵左右仰攻與化鳳率精銳擣其中堅獲其將甘輝及裨佐數人斬馘無
算成功兵潰走出海事聞部議失鎮江瓜洲當議罪上以固守江寧功大命免
議康熙元年改總管爲將軍仍以命喀喀木七年卒授其子喇揚阿一等阿達

哈哈番兼拖沙喇哈番

梁化鳳字耕天陝西長安縣人順治三年武進士四年授山西高山衛守備五年從英親王阿濟格討叛將姜瓖克陽和城擒瓖將郭二用擢大同掌印都司時大同左衛渾源太原汾澤羣盜競起應瓖六年化鳳攻大同破北窰溝寇據山巔懸柴以火燔之獲其渠李義張豹攻渾源徇韓村玉合堡張家堡破賈莊獲其渠王平乃克渾源又獲其渠方三唐虎誅之攻左衛降雲岡高山二堡遂合圍化鳳中三矢戰愈力寇以城降敍功超加都督僉事以副將推用進攻太原寇出戰化鳳左臂中鎗矢集於髀益奮門執所置巡撫姜建勳乃克太原進解平陽圍攻汾州敗其渠沈海攻孝義寇渠張爾德來援與戰大破之乃克汾州獲爾德海復以兵至再戰擊敗之走潞安迭下曹家堡記古塞善信堡介休平遙祁徐溝諸縣悉降進攻太谷克之獲其渠蘇升乃克潞安海走九仙臺拔長子進攻九仙臺山峻騎不得上以火攻之寇不支海出降進定澤州是歲凡二十二戰皆捷七年復殲餘寇於牛鼻寨獲其渠袁忠山西悉定八年借補江

南蕪永營參將討平石皿驚鷺二湖盜獲其渠楊萬科十二年擢浙江甯波副
將明將張名振屯崇明平洋沙總督馬國柱檄化鳳署蘇松總兵名振攻高橋
化鳳馳赴戰迭擊敗之遂復平洋沙十三年真除蘇松總兵化鳳以平洋沙懸
隔海中戍守不及沿海築壩十餘里使內屬並引水灌田俾海濱斥鹵化爲膏
腴會鄭成功攻崇明遣驪疑衆化鳳擒斬之督兵迎戰獲其將侯丁秀宮龍陳
義等又遣諸將設伏斬其將陳正縛致曾進等十一人成功引去七月復大舉
入寇連舟蔽江號百萬陷鎮江直犯江寧南北中梗化鳳將所部兵三千人疾
馳赴援升高瞭敵見成功軍不整樵蘇四出軍士浮後湖而嬉乃率五百騎夜
出神策門破白土山敵壘明日督兵出儀鳳門提督管效忠出鍾阜門夾擊搏
戰拔巨礮毀其木甍簡驍勇乘屋發火器矢石雜下成功兵奔潰遂至龍江關
獲其將余自新等成功收餘衆連營屯白土山衆猶數十萬又明日復與總管
喀喀木等出神策門直攻白土山督將士仰擊寇迎拒殊死戰甘輝者成功驍
將也化鳳入陳生獲之成功兵奪氣遂奔不可止逐北斬馘迫江上化鳳先遣

別將焚其舟成功兵自蹂藉及入江死者無算成功遁入海化鳳策成功當還
攻崇明先遣別將爲備成功出海攻崇明化鳳自江寧還援成功度不能克括
民舟將渡白茅口化鳳與相值絕流迅擊砲石盪海波成功復大敗跳而免敘
功授世職三等阿達哈哈番賜金甲貂裘十七年擢蘇松提督加太子太保左
都督化鳳疏言蘇松濱海地袤八百餘里標兵止二千餘請酌調省兵三千八
百立六營資捍禦下部議從之十八年上復錄化鳳功進世職三等阿思哈尼
哈番尋裁江安廬鳳提督以化鳳爲江南提督時議者以臺灣未復用廣東福
建例蘇松濱海立界徙居民於內地化鳳曰沿海設兵賦擬棄之地以養之國
既足兵民無廢業遷界何爲奏入上從其言康熙十年卒贈少保諡敏壯聖祖
巡西安遣官祭其墓乾隆初定封三等男肅其次子也以廢授川陝督標左營
游擊吳三桂亂起總督哈占令肅率兵駐黑水峪敗王輔臣之兵於觀音堂調
興安城守游擊從征漢中戰屢捷克達州加都督僉事三遷至福建陸路提督
四十五年擢福建浙江總督上南巡書旌常世美字賜之初金世榮爲總督謂

出洋大船易蔽盜奏定漁船不得用雙桅商船悉令改造樑頭不得過丈有八尺船力言無益海疆徒累於商民上命弛其禁四十七年疏言嘉湖諸水皆洩入太湖通津要道發帑疏治支河淤淺勸民開濬上諭支河勸民開濬慮有司藉此私派當併發帑疏治四十九年以母喪去官五十三年卒

劉芳名字孝五漢軍正白旗人初籍甯夏仕明至柳溝總兵順治元年降命仍原官二年調甯夏賜白金冠服時陝西初定多盜悍卒復伺隙謀亂芳名撫綏訓練莫樹威望銷亂萌總督孟喬芳疏獎其才武大定叛固原賀珍叛漢中師進討芳名皆有功三年方赴鞏昌剿寇甯夏兵遽變戕巡撫焦安民芳名馳還察知裨將王元馬德首亂遣德署花馬池副將分元勢偵元將出城就寇渠洪大誥芳名設伏俟元至伏發元力拒諸將樊朝臣姜九成等衷擊之元敗奔副將馬甯等追擊獲以歸芳名別遣將搜斬大誥德聞元誅而懼四年春芳名偕河東道馬之先出師惠安德乘間糾黨劫軍資遁入山合寇渠賀宏器等自紅古城出口襲破安定螺山寇王一林戕參將張紀以應之橫行甯固平慶間芳

名督所部兵進次亂麻川破賊復進次預望城再破賊斬一林德以四騎走追及之河兒坪縛而磔之亂乃定授三等阿達哈哈番擢四川提督定西將軍尋命以右都督留鎮甯夏五年討平香山寇李彩馬德之誅副將劉登樓預有功登樓居榆林甯塞多力而狡六年以延安叛應姜瓖易衣服自署大明招撫總督戕靖邊道夏時芳騰書致芳名芳名以見汙怒封其書示巡撫李鑑鑑以聞登樓西犯花馬池下興武諸營堡逼甯州時定邊屯蒙古札穆素叛逃賀蘭山芳名遣兵擊破登樓登樓走定邊屯結札穆素寇甯夏西境犯河東陷鐵柱惠安漢伯諸堡將犯靈州會固山額真李國翰師至乃定策鑑守寧夏禦札穆素芳名引兵東渡河趨榆林與登樓戰於官團莊大破之登樓退據漢伯師從之絕其水道遂合圍芳名督兵逼壘東南當矢石衝諸將進曰當移數武避賊鋒芳名厲色叱之曰死則死耳何懼爲且士卒多傷痍而我避鋒鏑可乎士卒益奮攻十二日克之斬登樓餘衆悉降亂定進世職二等疏言寧夏孤懸河外延袤千里鎮兵屢徵發兵單力薄請自後徵發缺額卽令招補備守禦又請以減

等罪人僉發沿邊資生聚皆下部議行十六年調隨征江南右路總兵加左都督率寧夏三營駐江甯鄭成功攻崇明芳名與提督梁化鳳共擊敗之十七年疏言臣奉命剿賊不意水土未服受病難瘳所携寧夏軍士訓練有年心膂相寄今至南方半爲痢瘡傷損及臣未填溝壑敢乞定限更調上報以優旨旋卒於軍加太子太保諡忠肅命所部將士還寧夏本鎮

胡有陞錦州人崇德元年睿親王多爾袞豫親王多鐸率師攻錦州有道人崔應時者與州民張紹禎門世文世科秦永福等謀以城降使有陞持書詣師期內應豫親王與書齋還明將調知之執應時等下獄有陞與紹禎世文世科永福脫走來歸各賜冠服鞍馬妻室奴僕授世職有陞得三等梅勒章京隸漢軍鑲黃旗屢從征伐進二等順治四年授南贛總兵五年金聲桓王得仁以南昌叛犯贛州副將高進庫出戰而敗巡撫劉武元與巡道張鳳儀分守城東西有陞率健卒循城策應得仁兵穴城將置火具仰攻有陞以石窒其竇閏三月糧匱有陞出戰得仁敗走聲桓聞征南大將軍譚泰師至引退有陞督兵追擊多

所斬馘未幾李成棟復來攻有陞乘成棟兵方鑿壕出戰大破之語互見武元傳初柯永盛自南贛總兵遷湖廣總督請以鎮兵二千自隨有陞疏言贛地江湖關鍵聲桓亂未平鎮兵習水土便征剿宜遣還鎮上從之六年聲桓誅成棟走死譚秦師還土寇猶未靖上猶劉飛龍南葉芝石城鄒華雲都彭順慶瑞金陳其綸皆負固爲亂有陞與武元分遣諸將次第討平之敘功加左都督賜紫貂冠服甲冑佩刀鞍馬進世職三等精奇尼哈番十年以尙可喜耿繼茂疏論有陞功復加太子少保十七年以老解官康熙三年武元子灋疏請加敘守贛州功有陞亦以請進一等九年卒子啟泰襲改隸正白旗再傳降襲一等阿思哈尼哈番乾隆初定封一等男

楊名高漢軍鎮黃旗人初籍遼東太宗時率其族百餘人來歸授牛永額眞兼任兵部理事官崇德間屢從征伐克塔山杏山擊敗明總督范志完取前屯衛中後所皆在行順治元年授世職牛永章京二年遷甲喇額眞三年擢都察院參政六年授福建漳州提督明新建王由模據大田勾延平高峯諸土寇爲亂

七年名高率師破石磯巔由模走永安副將王愛臣追獲之高峯寨渠陳光等招德化土寇鄭文薦來援名高令副將韓尙亮等率師截擊圍寨光奪圍走名高督兵奮擊寇多墮壕死師進次大田寇潰走敗之龍門橋擒其將郭奇廖明正諸寨悉降尋又率師徇邵武寇走入江西新城名高分兵三道進與總兵王之綱殿逐寇三十餘里擒其將洪國玉李安民王恒美等得牛馬鎗炮無算敘功進世職二等阿達哈哈番九年鄭成功自廈門陷長春潭浦海澄南靖諸縣以二十餘萬人寇漳州屯鳳巢山名高督兵擊破之成功退屯海澄所陷諸縣皆復尋復出陷漳州及所屬諸縣給事中魏裔介劾名高怠玩下總督佟岱按治坐奪官尋卒劉光弼漢軍鑲藍旗人初籍遼陽冒曹氏天聰五年命守耀州率兵從太宗伐明圍大凌河克城旁三臺城兵出戰光弼先衆馳擊我兵有陷陳者力援之出明監軍道張春總兵吳襄等自錦州赴援光弼馳入陳斬其裨將崇德五年授甲喇額真從攻錦州與墨爾根轄李國翰同克呂洪山諸臺屢擊敗松山杏山馬步兵明兵屯山口阻我師與國翰督兵奮戰明兵引去錦州

既下發砲攻克塔山杏山兩城及附近臺堡敍功予世職牛叅章京七年擢鎮
藍旗漢軍梅勒額真八年偕固山額真劉之源詣錦州督鑄礮尋從鄭親王濟
爾哈朗攻甯遠取前屯衛中後所順治元年從入關擊李自成旋從固山額真
葉臣徇山西克太原三年從端重親王博洛下浙江拔金華進定福建五年授
禮部侍郎從大將軍譚泰討金聲桓克南昌譚泰疏請以光弼署江西提督六
年平廣昌土寇旋命真除土寇張自盛洪國玉等據湖東爲亂光弼督參將陳
陞等討平之其黨董明魁郭承珉等皆降遇恩詔世職累進一等阿達哈哈番
十三年賜鞍馬弓矢十六年以老病致仕康熙十二年卒劉仲錦漢軍正藍旗
人初籍遼陽東甯衛崇德五年以牛叅額真從睿親王多爾袞等伐明圍錦州
騎兵千餘出迎戰仲錦擊破之迫薄城下始還復擊敗松山杏山呂洪山口敵
兵七年從鄭親王濟爾哈朗等攻塔山發礮擊城圯仲錦率所部兵先登克之
進攻杏山復發礮擊城毀其垣城人遂降敍功予世職牛簡前程八年從巴牙
喇薩章京阿爾津哈寧阿等伐黑龍江虎爾哈部克博和哩諾爾噶勒都里三

屯降大小喇勒達蘇綽庫禪能吉勒四屯賜貂皮白金復從攻寧遠取中後所前屯衛進世職甲喇章京順治元年從入關授戶部理事官兼甲喇額真從固山額真葉臣等徇山西克太原又從英親王阿濟格西討李自成自陝西下湖廣敗其將馬進忠得舟十一年擢兵部侍郎六年從睿親王討姜瓖攻渾源左衛進攻汾州皆發紅衣砲克之七年授山東臨清總兵加都督同知世職累進一等阿達哈哈番加拖沙喇哈番十年改福建右路總總兵加左都督駐泉州十一年以疾解任旋卒

論曰滿洲兵初入關分駐都會其後乃久屯置總管沙爾虎達招徠新滿洲劉之源巴山喀喀木鎮撫江南喀喀木合羣力摧大敵厥功尤著漢兵入關後來附者不復入烏真超哈循舊制分設提鎮化鳳援江寧與喀喀木同功芳名偕馬之先守寧夏有陞佐劉武元守贛州皆有殊績名高等以卿貳出專閫亦能稱其職者若富喀禪鎮西安烏庫理守盛京皆見於他篇故不復著

清史稿

列傳三十一

趙開心

楊義

林起龍

朱克簡

成性

王命岳

李森先

號字景輝

李嗣

季開生

號張宜

張煊

趙開心字靈伯湖南長沙人明崇禎進士官至兵部員外郎順治元年授陝西道監察御史是歲有自稱故明皇太子者令故明貴妃袁氏及故東宮官屬內監等視之皆言不相識開心及給事中朱徽疏請詳審下法司自承爲京師民楊玉以開心疏言太子若存明朝之幸論死上命免之二年疏言刑部治庶獄數日卽結正惟自別衙門發送者恒不時讞決久置獄中請令所司五日一稽核當鞠當釋勿使留滯並請通飭諸行省撫按遵行從之尋命巡視南城滿洲兵初入關畏痘有染輒死京師民有痘者令移居出城杜傳染有司行之急嬰

程輒棄擲開心疏請四郊各定一村移居者與屋宇聚處旋又疏言立政之始一事之得失關天下萬世之利害疏奏不能盡陳封章不敢頻瀆乞時賜召對齊顏聽受庶用人施政悉奉宸斷睿親王攝政入朝朝臣皆跪迎開心疏請勅禮部詳定儀注江浙湖廣諸行省初定開心疏請急置撫按以時綏撫並得旨俞允擢左僉都御史三年坐事罷八年召起原官旋超擢左都御史開心子而抃爲唐王時舉人九年開心疏乞許而抃會試禮部議不許開心坐奪職永不敘用十年諭曰開心有直名界風憲重任不言國家大事乃庇子瀆奏辜朕望實深朕念開心大臣一事差謬遂永棄不用心終未忍然召還京開心至疏論湖廣巡撫遲日益偏沅巡撫金廷獻鄖襄巡撫趙兆麟所屬寇盜充斥勦撫無能得旨下部察議又言江南諸行省每因捕治叛逆株連無辜如常鎮紳士王期昇路邁蔣拱辰等久錮獄中虛實未辨就一方一事可推之他省上命確察以聞時方考察京官甄別翰林開心疏論大學士馮銓陳名夏等各植門戶開朋黨之漸上命開心據實覆奏未能實指其人得旨申飭旋授原官十一年疏

陳時政請御經筵親奏對選賢才原過誤許流徙自贖重法司職掌上以疏中有屏斥毆游語諭曰講武習兵乃祖宗立國大法何謂毆游開心常談淺見沽名塞責殊負委任尋以名夏獲罪責言官不先事舉發降補太僕寺卿十二年遷戶部侍郎疏言畿甸流民載道有司恐誤留逃人聽其轉徙請暫寬隱匿逃人之罪以免株連俾流民得邀撫輯諭曰逃人之多因有隱匿者故立法不得不嚴何謂株連因責開心沽譽降補太僕寺丞尋擢少卿協理兵部督捕事十三年上以逃人多不獲所司督責不嚴復降補鴻臚寺少卿十六年遷太僕寺少卿康熙元年擢總督倉場戶部侍郎加工部尚書銜卒官

楊義山西洪洞人明崇禎進士官山東聊城知縣順治元年授河南汝陽知縣五年行取擢江西道御史巡視兩浙鹽政義疏請定行鹽掣驗之法遴選清廉有司照引盤驗御史親臨監掣八年睿親王得罪義劾工部侍郎李迎峻前官管繕郎中監造王府僭擬禁廷不數年開闢陞華廡請敕部治罪以迎峻事在赦前寢其議復巡視長蘆鹽政劾運使趙秉樞貪酷執法削籍逮治九年督學

江南尋掌京畿道事十一年大學士陳名夏得罪義因劾請告侍郎孫承澤黨附名夏下部令承澤休致吏部尙書劉正宗薦降調員外郎董國祥擬授文選司郎中義面詰正宗專擅卽具疏劾之正宗得旨察議國祥卒以贓敗謫徙尙陽堡十二年條陳時政言學士呂宮久疾曠職宜令歸田養大臣廉恥巡按既停閱城審錄諸事督撫按期巡行宜令簡隨從慎關防毋以擾民兵民匱乏請令各州縣廩生捐銀准貢以給滿洲兵備鞍馬器用餘賑被災貧民諭旨嚴禁加派有司抗不遵行如臣籍洪洞地畝正糧外又加驛站坐司馬夫工食公費等項幾半正糧所敕禁革會宮已得旨致仕飭下所司議行時議復殷巡按義奏請甄舉才守兼優考試請簡不拘資俸是歲四遷至刑部侍郎十四年調工部十七年調倉場侍郎擢工部尙書康熙元年致仕卒

林起龍順天大興人順治三年進士授吏科給事中疏請嚴禁白蓮大成混元無爲等邪教又疏請重守令課以十五事曰招流亡墾荒萊巡阡陌勸樹藝稽戶口均賦稅輕徭役除盜賊抑豪強懲衙蠹賑災患濟孤寡濬溝池治橋梁興

學校考其殿最而大吏以時訪察俱如所奏行四年劾山東巡撫丁文盛不能
弭盜並薦大理寺卿王永吉可代部議以起龍有私降二級外用又坐劾登州
道楊雲鶴婪贓不實奪官世祖親政召來京十年復原官時軍旅未靖愈轉餒
不遑言積貯起龍請敕計臣籌畫先實京倉次及近輔各直省務使倉有儲穀
備水旱應調發又言滿洲兵昔在盛京無餉而富今在京師有餉而貧時地既
迥異法制宜更定凡駐守征行所需馬匹草束軍裝戎器悉動官帑籌備毋使
拮据疏入諭曰滿洲兵建功最多資生無策十年來未有言及此者起龍實心
爲國忠誠可嘉下部議以五品京堂用起龍疏辭十一年轉刑科加大理寺丞
銜疏言州縣吏媚事上官耗費不貲請禁革並請遣廉能大臣巡行各直省體
察利弊既疏劾總河楊方興及工部尙書劉昌召方興昌相質所劾皆不實部
議當杖流上特宥之左授光祿寺署正十二年遷大理寺寺丞十三年一歲中
三遷擢工部侍郎十五年改戶部侍郎總督倉場十六年加太子少保疏請更
定綠旗兵制略言有制之師兵雖少一以當十餉愈省兵愈強而國富無制之

師兵雖多萬不敵千餉愈費兵愈窮而國貧今綠營兵幾六十萬而地方有事即請滿洲大兵雖多仍不足用推原其故總緣將官赴任召募家丁隨營開糧軍牢伴當吹手輜夫皆充兵數甚有地方鋪戶子姪充兵免徭其月餉則歸之本管馬兵剋扣草料驛遞缺馬亦供營兵應付是以馬皆骨立鞭策不前又如弓箭刀鎗盔甲火器俱鈍弊朽壞帳房窩鋪雨衣弓箭罩則竟闕不具春秋兩操不復舉行將不知分合奇正之勢兵不知坐作進退之法徒空國帑竭民膏雖衆何益推其病有二一則營兵原以戡亂今乃責之捕盜一則出餉發兵原以備戰守之用今則加以剋扣兵丁所得僅能存活又不按月支發貧乏何以自支今誠抽練綠旗精兵二十萬養以四十萬之餉餉厚兵精地方有警戰守有人不過十年可使庫藏充溢下所司議行十七年加太子太保兵部尙書巡撫鳳陽時議懲官吏犯贓視輕重科罪不許納贖起龍疏請如舊例收贖充餉下廷議請從之上曰立法止貪今因濟餉而貸法如民生何繼起龍議不行聖祖卽位授起龍漕運總督迭疏請免濱海移民田地賦額濬淮城廵南連河直

達射陽湖修築濟甯臨清諸處隄閘並請禁運丁毋病民運弁毋病丁條議以上皆從其請又疏請禁運丁多携貨物稽滯漕運定分地稽察例六年糧艘至濟甯運丁有多携貨物者事覺總河盧崇岐疏陳起龍言江南漕儲道既裁總漕不任稽察御史張志尹糾起龍不引罪上以詰起龍起龍謝失職鵠三級休致卒嘉慶四年仁宗親政閱世祖實錄得起龍更定綠營兵制疏諭諸行省督撫整飭營伍並以所言抽練精兵是否可仿行飭妥議具奏請行省督撫憚改作議格不行

朱克簡字敬可江南寶應人順治四年進士授內閣中書五年考授御史八年典廣東鄉試十二年巡按福建福建八府一州其五濱海鄭成功時入寇民苦焚掠克簡至申明軍政綱繆防禦請增兵防仙霞關時兵部尙書王永吉疏請減兵額汰營兵老弱下諸行省克簡疏言福建內防山賊外禦海寇省兵三萬四千不可復減上如其議又疏論防海略言用水師不難得其力難得其心漳泉爲鄭成功故土沿海多戚屬宜以連保法察其蹤跡考其身家不使入伍降

者令歸耕或移置他軍使離舊巢乃堅歸志水師戰海中破浪禽賊當受上賞
宜著爲令水師用在舟木竹釘鐵油麻櫻葉皆海之所無一物不具不可以爲
舟宜設專官譏察毋以資敵寧化崇安濱海要地今俱爲賊踞當按形勢增兵
固守又立六規二十四約與提督馬成功總兵王之綱等深相結納諸將咸奉
令巡汀州聞成功兵攻福州即率汀州鎮兵還援成功兵引退克簡入城曰寇
知我援寡且復來令完城垣簡卒伍爲備數日成功兵復至初官軍得成功兵
輒誅之克簡令髮不過五寸者貸死編爲民得萬餘人皆恩克簡至是助守城
發礮擊寇寇潰遂出戰解圍去至漳州布政使詳請徵通賦克簡力阻之疏請
蠲征上從之至福清以閩安地當衝設兵守之連江羅源福清長樂諸縣要隘
皆置汛至興化見道有流民與知府張彥珩議賑活者萬數千人至泉州令崇
武獺戶大盈諸隘皆置汛至延平知其地舟人多通寇令循江諸州縣設循環
簿譏察汀州延平建安三郡多伏戎克簡遣兵破其巢穴離其黨羽次第皆就
撫迭疏請汰冗員蠲鹽課恤驛困皆報可秩滿乞歸康熙三十二年卒子約以

副貢生充教習歷知福安南豐費諸縣擢晉州所至皆有惠政成性字我存江南和州人順治六年進士授中書科中書十四年改授御史巡按福建疏言福建山海征剽師旅繁興民窮地荒條上四策一曰嚴汛守濱海地寥廓不能徧防臣愚以爲宜設水師求熟練舟楫諳識水性之將吏廣選舵工水手繚旋招斗惟其能者廩餉不爲常格以舟爲家銃械用其長技操演習熟庶幾水師可成泉州近賊巢水師宜移石湖崇武石芝駐陸軍爲聲援惠安北有峯尾司宜駐兵爲惠州藩籬同安隣廈門當於高浦設屯劉五店置警礮時出游騎巡視要隘此又惠州之唇齒也一曰分界址有司禁遏接濟商阻物貴民生窮暨臣愚以爲先定禁例若竹木鉛鐵硝磺油麻毋許通貿小民日用所需宜聽轉運惟濱海大道或捷徑可通者嚴立疆界更定勾稽文法以時比驗自泉州西出延平上游去海甚遠百貨交易宜聽民便一曰輯降衆山海嘯聚之徒漸次來降入伍者多歸耕者少間有悍氣未馴凌轢鄉里居民亦負氣不相下許訟不受理則自相格鬥臣愚以爲宜令解散宿怨禁止羅織新附之衆合者漸分衆

者漸散近者漸遠庶可消弭反側一日清營伍府縣編氓既有保甲諸營什伍猶未整齊臣愚以爲當責成兵吏自爲版籍略做保甲之制同居連坐則軍伍肅盜源遏矣事下兵部議行既又上疏言下游四府濱海海徼無險阻可守且又兵力所不及宜令居民築土堡多備長鎗鳥銃習爲團練賊至人自爲守家自爲戰馳報附近將領以兵赴援久之使賊糧絕勢窮未有不瓦解者也又疏論鹽場利弊請裁上里海口牛田諸場以福清知縣領其事十六年報績授兵部主事移疾歸康熙七年始出就官十一年授工科給事中時議招募游民開墾荒田性疏言民貧不能耕乃有荒田游民既失業安能開墾請敕督撫令縣官勸民開墾無力者上布政司給牛種資錢以本縣之民墾本縣之田官既易於稽察朝廷本貲亦易於征收又迭疏請獎進廉吏爲國家培元氣密諭推舉督學以重人才根本之地又疏陳民生十害謂州縣胥役挾持長吏爲衙蠹之害官吏私交舊讖關說曲直爲抽豐之害鄉民錢糧訟獄必投在城所主之戶聽其侵蝕唆使爲歛家之害大奸巨猾武斷鄉曲爲奸豪之害督撫及司道胥

吏干託有司爲上官胥吏之害丞簿佐貳濫受訟牒爲佐貳之害奸民譁張上控株連蔓衍爲越訴之害顏料本色緣時價低昂不載由單任意苛斂爲雜派之害百姓十室九空無藉乘急取利逐月合券俗謂印子錢利至十之七八折沒妻孥爲放債之害郵傳往來強捉人夫挽舟負輿爲絳夫之害請下所在有司每季書狀不蹈十害中大吏按驗又請飭督撫嚴飭所司復社學講鄉約舉節孝立義冢不力行者不得與卓異旋擢掌科十五年以疾乞歸家居三年卒國初循明舊御史出爲巡按七年罷旋復設八年世祖親政特敕誠諭並命都察院察訪舉劾御太和殿召新命諸巡按入見賜坐宣諭十七年都察院復請罷王大臣會議安親王及侍郎石申等議留別疏上又以御史陸光旭疏爭令再議仍議罷不復設巡按能舉其職者又有甯承勳按河南請塞黃河決口秦世植按江蘇劾罷巡撫土國寶最知名承勳大興人明天啟舉人自禮部主事考選御史官至大理寺右寺正世植自有傳

王命岳字伯咨福建晉江人順治十二年進士改庶吉士時雲南貴州未定策

問及之命岳言李定國貳於孫可望當緩定國行間使與可望相疑忌我兵以守爲戰以屯爲守視隙而動上異之擢工科給事中上經國遠圖疏略言今國家所最急者財也歲入千八百四十一萬有奇歲出二千二百六十一萬有奇出浮於入者四百四十七萬國用所以不足皆由養兵各省鎮滿漢官兵俸米草豆都計千八百三十八萬有奇師行芻秣又百四十萬其在京王公百官俸薪披甲俸餉不過二百萬是則歲費二千二百萬十分在養兵一分在雜用也臣愚以爲今日不宜再議剝削以給兵餉而當議就兵生餉之道河南山東湖廣陝西江南北浙東西江西閩廣諸行省迭經兵火水旱田多荒廢宜令各省駐防官兵分地耕種稍俟明洪武中屯田之法初年有司給與牛種耕具俟糧自次年後兵皆自食其力便可不費朝廷金錢此其爲利甚溥古者郡縣之兵什伍相配千百成旅將帥因而轄之乃者將帥多以僕從廚役優伶爲兵其實能操戈殺賊者十不得二三故食糧有兵充伍無兵官去兵隨難議屯種今當先定兵額官有升降兵無去來平定各省及去賊二三百里外者皆給地課耕

因人之力與地之宜一歲便可生財至千餘萬羣情不爲深慮不過議節省某項清察某項譬如盤水何益旱田臣見今日因賊而設兵因兵而措餉因餉而病民民復爲賊展轉相因深可隱憂要在力破因循斷無不可核之兵斷無不可耕之田斷無不可生之財疏下各直省督撫議格不行世祖惡貪吏令犯贓十兩以上籍沒命岳疏言立法愈嚴而糾貪不止病在舉劾不當請敕吏部督撫按舉劾疏至當參酌公論果有賢者見毀不肖者蒙譽據實覆駁如部臣耳目有限科道臣皆得執奏又按臣原有都察院考核甄別督撫本重臣言官恐外轉爲屬吏參劾絕少請特敕責成簡別精實每歲終仍命吏部都察院考核督撫舉劾當否詳具以聞庶激勵大法以倡率小廉轉戶科再上疏論漕弊大要謂百姓爲運官所苦運官又自有其苦不得不苦百姓請革通倉需索禁旗丁混搶倉場督臣親監河兌福建方用兵時又苦旱命岳疏陳六事曰緩徵買糶勸賑督催協餉嚴治奸盜安置投誠十五年調兵科師下湖廣命岳復申屯田之議請復明軍衛屯田之制設指揮千百戶等官以勞久功多之臣膺其任

子孫世及無漕之地專固封疆有漕之地即使領運新附之將有功亦得拜官
量易其地勿在本省尋疏言各省除荒之數歲縮銀五百五十萬有奇荒地以
河南山東爲最多請選清正御史督察二省田地率諸州縣清丈編造魚鱗圖
冊他省除荒多者如例均丈得旨舉行命岳又上清丈事宜十餘條明桂王旣
出邊雲南猶未平命岳疏言雲南歲餉九百萬而一省正雜賦稅都計十六萬
有奇是以九百萬營十六萬之地也雲南原有舊屯萬一千一百七十一頃有
奇科糧三十八萬九千九百九十二石有奇請敕巡撫袁懋功責成原軍換帖
領種暫發二十萬金買牛辦種借給軍民經年銷算必無虧損又可收復科糧
舊額且官收額內軍餘額外每粟一石價可三金視今年每石十二金已省餉
費四分之三庶幾兵食兼足不至竭天下之物力以奉一隅上可其奏命發十
萬金買牛辦種修復舊屯命岳乞假歸葬還朝疏言賊習於海戰我師皆北人
不諳水性惟有堵截隘港禁絕接濟嚴號令輕徭賦與民休息使民不爲賊賊
不得資久之必有繫醜獻闕下者吏部以浙江右布政員盡忠邊廣東左布政

命已下命岳劾其貪穢盡忠坐罷康熙初使廣東還遷刑科都給事中時陳豹據南澳尙爲明守命岳疏請招約收南澳尋以議獄未當奪官六年畿輔旱詔求直言命岳家居以天子方冲齡宜覽古今廣法戒撰千秋寶鑑書垂成未進卒

李森先字琳枝山東掖縣人明崇禎進士順治二年自國子監博士考選江西道監察御史啟睿親王發大學士馮銓貪穢及其子源淮諸不法狀御史吳達給事中許作梅莊憲祖杜立德御史王守履羅國士鄧孕槐桑芸等先後論劾睿親王於重華殿集大學士刑部科道諸臣召銓等面質以爲無實迹語詳銓傳責森先啟請肆市語過當奪官世祖既親政銓能去九年十一月大學士范文程以劾銓諸疏進上閱之竟曰諸臣劾銓誠當何爲以此罷文程曰諸臣劾大臣無非爲君國上當思所以愛惜之且使大臣而能鉗制言官非細故也越數日上諭吏部諸臣以劾銓罷者皆起用森先補原官十三年巡按江南劾能貪吏淮安推官李子燮蘇州推官楊昌齡論如律巡蘇州杖殺不法僧三遮優

王紫稼並爲優張榜少年沈濬一時震悚淮安吏張電臣坐侵蝕漕折銀一百二十兩有奇例當追比森先爲疏請緩之上責森先徇縱奪官逮至京訊鞫事白復原官十五年應詔陳言略曰上孜孜圖治求言詔屢下而諸臣遲回觀望者皆以從前言事諸臣一經懲創則流徙永錮相率以言爲戒耳臣以爲欲開言路宜先寬言官之罰如流徙諫臣李呈祥李開生魏瑄李嗣郝浴張鳴駿等皆與恩詔因公註誤例相應倘蒙俯賜軫恤使天下昭然知上寬宥直臣在遠不遺凡有言責者有不洗心竭慮而興起者乎上責其市恩徇情奪官下刑部議流徙尙陽堡上仍寬之復原官尋命察荒河南用左都御史魏裔介言給敕印未訖事而卒十七年上命吏部開列建言得罪諸臣其流徙者舉呈祥瑄嗣開生及彭長庚許爾安凡六人上命釋呈祥許瑄開生歸葬餘雖係建言情罪不同無可寬免嗣開生自有傳長庚爾安事見睿親王傳呈祥字吉津山東霑化人明崇禎進士選庶吉士順治初授編修累遷少詹事十年二月條陳部院衙門應裁去滿官專用漢人上諭大學士洪承疇等曰呈祥此奏甚不當昔滿

臣贊理庶政弼成大業彼時豈曾咨爾漢臣朕滿漢一體眷遇奈何反生異意耶副都御史宜巴漢等因劾呈祥奪官下刑部坐呈祥巧言亂政論斬上命免死流徙盛京居八年至是命釋還詣京師疏謝遂還里康熙二十七年卒瑄字昭華山東壽光人明崇禎進士官御史順治二年以薦起原官巡按甘肅請開馬市以柔遠人下部議行涼州兵劫參議道廨捕得倡亂者二十餘人瑄疏言西陲兵驕悍由明季專事姑息養姦滋亂宜用重典上命悉誅之並詔後有犯者首從駢斬著爲令四年授江甯學政七年還京掌河南道八年漕運總督吳惟華請輸銀萬又括諸項羨餘得九萬三千請以助餉瑄疏言淮揚連年水旱惟華輸餉皆分派屬吏仍取自民間乞賜察究會巡漕御史張中元發惟華貪贖狀速治奪官瑄又劾鄖陽撫治趙兆麟甄別文武屬吏薦舉多至數十糾劾僅一二微員上爲責兆麟并誠諸督撫不得劾微員塞責九年授順天府府丞十二年遷大理寺卿八旗逃人初屬兵部督捕部議改歸大理寺瑄疏言其不便乃設兵部督捕侍郎專董其事又言逃人日多以投充者衆本主私縱成習

聽其他往日久不還概訟爲逃人逃人至再罪止鞭百而窩逃猶論斬籍人口財產給本主與叛逆無異非法之平下九卿議改爲流免籍沒又言窩逃瘦斃妻子應免流徙時遇熱審亦應一體減等上責其市恩下王大臣議瑄巧寬逃禁當坐絞上寬之降授通政司參議德州諸生呂焯窩逃事發州官當坐罪瑄持異議王大臣劾瑄因追議瑄前請熱審減等爲煌地坐奪官流徙遼陽卒於戍所上既許歸葬並宥其孥還故里諸與森先同時劾馮銓者吳達江南人自刑部員外郎授御史二年七月疏言今日用人皆取材於明季抗直忤時山林放棄此明季所黜而今日當用者也逆黨權翼貪墨敗類此明季所黜而今日不可不黜者也持祿養交倒行逆施此明季未黜而今日不可不黜者也定鼎初年藉招徠爲名猶可兼收邪正江南既定人材畢集若復涇渭不分則君子氣沮宵小競進卽如阮大鍼袁宏勛徐復陽輩聯袂而至豈可概加錄用乎至廣開言路尤爲創業急務乃動責回奏是沮敢諫之氣而塞後進之路也卽如趙開心論事爽剴用其人矣而所規切時政果一一用之否耶得旨朝廷用人

非曰誘之若先既錄用後無罪而黜是有疑心矣屢飭回奏欲求其實非沮言路也疏寢不用旋命巡按山東湖南官至太僕寺少卿桑芸山西榆次人自行人授御史巡按順天累遷光祿寺卿出爲河南汝南道參政督民墾荒土除雜派捕治巨猾斃杖下累遷廣東左布政道卒又有許作梅河南新鄉人亦以劾銓罷復起官至太僕寺少卿王守履山西寧鄉人自工部郎中授御史巡按湖北羅國士山東德州人自禮部主事授御史巡按順天莊憲祖直隸東光人以明進士起戶科給事中順治三年新進士除科道憲祖與吏科都給事中向玉軒疏爭下刑部並坐奪官玉軒四川通江人鄧孕槐失其籍自順天府推官授御史巡按江南

李嗣字龍寰山東高密人順治六年以舉人攷授內院中書舍人擢禮科給事中轉兵科劾吏部郎中宋學洙典試河南宿妓納餽實奪官八旗以俘獲爲奴僕主遇之虐輒亡去漢民有願隸八旗爲奴僕者謂之投充主遇之虐亦亡去逃人法自此起十一年王大臣議匿逃人者給其主爲奴兩隣流徒捕得在

途復逃解子亦流徙上以其過嚴命再議仍如王大臣原議上十二年朔上疏極論其弊曰皇上爲中國主其視天下皆爲一家必別爲之名曰東人又曰舊人已歧而二之矣謂滿洲役使軍伍猶兵與民不得不分州縣追攝逃亡猶清勾逃兵不得不嚴覈是已然立法過重株連太多使海內無貧富良賤皆惴惴莫必旦夕之命人情洵懼有傷元氣可爲痛心者一也法立而犯者衆富思其何利於隱匿而懲不畏死此必有居東人爲奇貨挾以爲罔股實破家奴婢爲禍名義蕩盡可爲痛心者二也犯法不貸牽引不原即大逆不道無以加此破一家即耗一家之貢賦殺一人卽傷一人之培養十年生衆十年教訓今乃用逃人法戕賊之乎可爲痛心者三也人情不甚相遠使其居身得所何苦相率而逃況至三萬之多其非盡懷鄉土念親戚明矣不思恩義維繫但欲窮其所往法愈峻逃愈多可爲痛心者四也自逮捕起解至提赴質審道路騷難犬不寧無論其中冤陷實繁而瓜蔓相尋市竄銀鑄殆盡日復一日生齒彫殘誰復爲皇上赤子可爲痛心者五也又不特犯者爲然饑民流離以譏察東人故

吏閉關民扃戶無所投止嗟此窮黎朝廷方蠲租煮粥衣而食之柰何因逃人
法迫而使斃可爲痛心者六也婦女獨躑於郊原老稚僮仆於溝壑強有力者
犯霜露冒雨雪東西迫逐勢必鋌而走險今寇孽未靖招撫不遑本我赤子乃
驅之作賊乎可爲痛心者七也臣謂與其嚴於既逃之後何如嚴於未逃之先
今逃人三次始行正法其初犯再犯不過鞭責請敕今後逃人初犯卽論死皇
上好生如天不忍殺之當倣竊盜刺字之例初逃再逃皆於面臂刺字則逃人
不敢逃卽逃人自不敢留矣疏入留中後十餘日下王大臣會議僉謂所奏雖
於律無罪然七可痛情由可惡當論死上弗許改議杖徒甯古塔上命免杖安
置尙陽堡逾年卒上深知逃人法過苛重紕王大臣議罪褫十三年六月諭曰
朕念滿洲官民人等攻戰勤勞佐成大業其家役使之入皆獲自艱辛加之撫
養乃十餘年間背逃日衆隱匿尤多特立嚴法以一人之逃匿而株連數家以
無知之奴僕而累及官吏皆念爾等數十年之勞苦萬不得已而設非朕本懷
也爾等當思家人何以輕去必非無因爾能容彼身彼自體爾心若專恃嚴法

全不體恤逃者仍衆何益之有朕爲萬國主犯法諸人孰非天生烝民朝廷赤子今後宜體朕意省改使奴僕充盈安享富貴十五年五月復諭曰督捕逃人事例屢令會議量情申法衷諸平允年來逃人未止小民牽連被害者多聞有姦徒假冒逃人詐害百姓將股實之家指爲窩主挾詐不已告到督捕冒主認領指詭作眞種種詐僞重爲民害如有旗下姦宄橫行許督撫速捕併本主治罪逃人禍自此漸熄

季開生字天中江南泰興人順治六年進士改庶吉士累遷禮科給事中明將張名振犯上海開生疏言防禦海寇宜遠偵探扼要害備器械嚴海禁杜接濟密譏察十一年因地震疏言地道不靜民不安也民之不安官失職也官之失職約有十端一曰格詔旨二曰輕民命三曰縱屬官四曰庇胥吏五曰重耗尅六曰納餽遺七曰廣株連八曰閣詞訟九曰失彈壓十曰玩糾劾分疏其目以上章下所司調兵科右給事中十二年秋乾清宮成發帑遣內監往江南採購陳設器皿民間訛言往揚州買女子開生上疏極諫得旨太祖太宗制度宮中

從無漢女朕奉皇太后慈訓豈敢妄行即太平後尙且不爲何況今日朕雖不德每思效法賢聖主朝夕焦勞若買女子入宮成何如主耶因責開生肆誣沽直下刑部杖贖流尙陽堡尋卒戍所十七年早下詔罪已命吏部察謫降言官諭曰季開生建言原從朕躬起見准復官歸塋蔭一子入監讀書弟振宜字誥兮順治四年進士授浙江蘭溪知縣行取刑部主事遷戶部員外郎郎中十五年考選浙江道御史及上以早下詔罪已言二十三年間時有過舉振宜疏言伏讀上諭興革責之部院條奏責之科道而內閣諸臣闕焉未及夫用人行政其將用未用將行未行之際毫釐千里間不容髮天顏咫尺呼吸可通者惟內閣諸臣皇上親政以來憂勤惕厲原未見有過舉皇上以爲有過舉矣試問其時有言及者乎則宰相之不言亦可見矣皇上以心膂股肱寄之內閣諸臣徒以票擬四五字了宰相事業皇上縱不譴責清夜捫心恐有難以自慰者得旨閣臣不能盡言初非其罪前諭二十三年間過舉皆已行之事朕心過失即今豈能盡無閣臣何由得知部覆章奏照擬票發皆朕親裁亦非閣臣之咎

朕恒慮此心稍懈諸臣其各加內省左都御史魏裔介疏劾大學士劉正宗並
國亂政振宜亦疏舉正宗樹黨納賄諸罪狀正宗以是得罪互見正宗傳振宜
又疏言府庫已竭兵革方興雲南守禦專任平西王滿兵抽十之四五駐湖南
鄭成功爲閩浙江南三省之患當擇地駐兵絕其登陸閩撫徐永楨浙督趙國
祚浙撫史記功軍旅皆不嫻習宜簡賢員以代其任山東河南輔翼京師連年
水旱盜賊實繁北直八府白晝公行劫掠明末流寇股鑿不遠蒙古闖入陝西
洗岷一帶耕種西甯抵宣大長城頽塌防衛空虛國家中外一統疆界原宜分
明何可聽其出入不加譏察又請復六科封駁舊制復以揚徐近河諸縣加派
河夫爲民間重累疏請申禁下部議行尋命巡視河東鹽政乞歸卒順治初以
建言名者又有給事中常若柱張國憲若柱疏言賊相牛金星弑君殘民抗拒
王師力盡始降宜嬰顯戮乃復玷列卿寺視顏朝右其子銓同父作賊冒濫爲
官任胡廣糧儲道賊私鉅萬請將金星父子立正國法以申公義快人心得旨
流賊官投誠者多能效若柱此奏殊不合理應議處遂罷歸國憲疏言前

朝廠衛之弊如虎如狼如鬼如蜮今易錦衣爲鑿儀此輩無能逞其故智乃臣聞有緝事員役在內院門首訪察賜畫賜畫特典內院重地安所用其訪察城狐社鼠小試其端臣竊謂宜大爲之防也疏入下廷臣議禁止得旨鑿儀衛專司扈從訪役緝事一概禁止廠衛之禍始息若柱陝西蒲城人順治三年進士除吏科給事士自庶吉士改戶科給事中國憲順天宛平人順治三年進士除吏科給事中

張煊山西介休人明崇禎間進士自知縣擢河南道御史爲大學士陳演所構遣戍順治元年薦起原官以髮歸三年復補浙江道御史仍掌河南道事六年疏言有司賤削小民督撫徇不以告言官論劾乃其職守乞付廷臣公議勿遽下獄對理上從之諭惟挾仇誣陷仍奪官治罪自非然者雖有不實不得逕送刑部八年疏言文武全才難得近以武職改任督撫恐政體民瘼未必曉暢請還本職又言貪吏坐贓多委諸吏役遇赦輒復原官請將授免諸人應左降者調補間曹應奪官者勒令休致下部議行是年值計典煊以河南道掌計册劾

御史李道昌王士驥金元正匡爾兆李允鼎等巡方失職時大學士洪承疇掌都察院甌別諸御史議道昌降調士驥等均奪官并列煊外轉煊疏劾吏部尙書陳名夏以故明修撰諂事睿親王驟陟尙書父爲縣民所殺賜銀歸葬名夏資緣奪情卹典空懸因舉紊亂銓序把持計典列十罪二不法并及名夏與洪承疇陳之遷於火神廟屏左右密議承疇送母回籍未先奏亦非法疏下王大

臣勸奏時上方出獵巽親王滿達海等召名夏承疇與煊質名夏事俱實承疇言火神廟集議卽爲甌別諸御史送母回籍未先奏當引罪上還京復命王大

臣廷鞫吏部尙書譚泰祖名夏奏名夏事在赦前煊奏多不實且先爲御史不言今當外轉挾私誣讎罪當死因坐絞九年正月譚泰得罪上復發煊疏命王

大臣覆讞名夏坐奪官語詐名夏傳遂下詔雪煊冤贈太常寺卿賜祭葬以贈

官官其子基遠官至禮部侍郎

論曰國初言事侃侃以開心爲最義起龍皆用言事致顯擢克簡巡方著聲績命岳策屯田雖未用要自有所見森先姻開生以譽直蒙譴獨森先復起煊死

非罪世尤哀之然挾外轉之嫌授譏人以隙與森先諸人不同矣

清史稿

列傳三十二

剛林

新化縣人

馮銓

李之朝

陳名夏

陳之遴

劉正宗

鎮江人

剛林瓜爾佳氏字公茂滿洲正黃旗人世居蘇完初來歸隸正藍旗屬郡王阿達禮授筆帖式掌繙譯漢文天聰八年以漢文應試中式舉人命直文館崇德元年授國史院大學士與范文程希福等參與政事疏請重定部院承政以下官各五等又疏請定試士之法皆報可太宗四征不庭疆宇日闢剛林屢奉使軍前宣布威德咸稱上旨積功授世職牛叅章京八年阿達禮有罪改隸正黃旗世祖定鼎進世職二等甲喇章京三年四年迭主會試考滿進世職一等阿達哈哈番五年復進三等阿思哈尼哈番賜號巴克什六年充太宗實錄總裁復主會試疏請令六科錄諸臣章奏並批答月送史館備纂修國史報可八年以編撰明史闕天啟四年至七年實錄請勅懸賞購求崇禎一朝事蹟無考其

有野史外傳並令訪送章下所司睿親王多爾袞得罪剛林阿附睿親王參與移永平密謀又與大學士祈充格擅改太祖實錄爲睿親王削匿罪愆增載功績坐斬籍沒祈充格烏蘇氏滿洲鑲白旗人世居瓦爾喀國初從其族吉思哈等來歸太宗時號四貝勒以祈充格嫻習文史令掌書記天聰五年初設六部授禮部啟心郎八年考績授牛錄額真崇德元年睿親王多爾袞伐明攻錦州命鞏阿岱往濟師祈充格從師有功還報捷三年睿親王復伐明太宗親餞於郊祈充格以不啟豫親王多鐸從上出送又於是日私往屯莊坐死命寬之奪官貫耳鞭責以隸睿親王順治二年授弘文院大學士充明史總裁官冊封朝鮮世子正使四年考滿加授牛錄額真六年充太宗實錄總裁官與剛林等同主會試八年與剛林同誅

馮銓字振鸞順天涿州人明萬歷進士授檢討諂事魏忠賢累遷又淵閣大學士兼戶部尚書加少保兼太子太保以微忤罷去莊烈帝既誅忠賢得銓罷官後壽忠賢百韵詩論杖徒贖爲民順治元年睿親王既定京師以書徵銓銓聞

命卽至資冠服鞍馬銀幣令以大學士原銜入內院佐理機務與大學士洪承疇疏請復明票擬舊制又與大學士謝陞等議定郊社宗廟樂章十月朔世祖御皇極門受賀給事中孫承澤疏糾朝班雜亂語侵內院銓與陞承疇乞罷諭令益殫忠猷以襄新治二年授弘文院大學士兼禮部尙書御史吳達劾銓向降將姜瓖索銀三萬許以封拜未稱其意內院政本所關乃令其子源准擅入張宴歡飲給事中許作梅莊憲祖杜立德御史王守履羅國士鄧孕槐桑芸等亦交章劾銓得招撫侍郎江萬緒金爲源准賄招撫侍郎孫之獬充標下中軍禮部侍郎李若琳爲銓黨羽庸懦無行御史李森先疏繼入語尤峻略謂明二百餘年國祚壞於忠賢而忠賢當日殺戮賢良通賄謀逆皆成於銓此通國共知者請立彰大法戮之於市疏並下刑部鞠問刑部以所劾不實啟睿親王王集廷臣覆讞以銓降後與之獬若琳皆先薙髮之獬家男婦並改滿裝諸臣遂謀陷害王謂三人者皆恪遵本朝法度詰責科道諸臣給事中龔鼎孳言銓附忠賢作惡銓亦反詰鼎孳嘗降李自成王問鼎孳語實否鼎孳曰豈惟鼎孳

魏徵亦嘗降唐太宗王因斥鼎孽遂寢其事以森先言過甚奪官互見森先傳三年正月銓疏言臣蒙特召入內院列同官舊臣之前臣固辭不敢攝政王而諭國家尊賢敬客卿其勿讓今海宇漸平制度略定金臺駿骨暫示招徠久假不歸實逾涯分况叨承寵命賜婚滿洲理當附籍滿洲編氓之末迴釋尊賢敬客之諭輾轉悚懼特懇改列范文程剛林後如以新舊爲次并當列所充格審完我後得旨天下一統滿漢無分別內院職掌等級原有成規不必再定是年命典會試列范文程剛林後審完我前四年復典會試六年加少傅兼太子太傅八年上親覈諸大臣功績諭銓先經吳達奏劾得叛將姜瓖賄便當引去乃隱忍居官七年以來無所建白令致仕李若琳儉專擅與銓朋比爲奸奪官永不叙用銓旣罷代以陳名夏坐事奪官代以陳之遴亦不久罷上復召銓還諭曰國家用人使功不如使過銓素有才學博洽諳練朕特召用以觀自新銓至召見又與承疇文程等同夕對論翰林官賢否上曰朕將親試之銓奏曰南人優於文而行不符北人短於文而行或善今取文行兼優者用之可也上頷

之仍授弘文院大學士以議總兵任珍罪坐欺飾論絞上命寬之銓入謝奏對失旨諭誡之豐鼎孳爲左都御史復劾銓上命指實鼎孳言銓罪過頗多惟以密勿票擬非如諸曹有實可指上切責鼎孳十二年居母喪命入直如故尋加少師兼太子太師十三年上以銓衰老加太保致仕仍令在左右備顧問銓疏請回籍許之十六年改設內閣命以原銜兼中和殿大學士康熙十七年卒諡文敏旋命削諡孫之獬山東淄川人明天啟進士授檢討遷侍讀以爭毀三朝要典入逆案削籍順治元年侍郎王鰲永招撫山東土寇攻淄川之獬斥家財守城山東巡撫方大猷上其事召詣京師授禮部侍郎二年師克九江之獬奏請往任招撫從之加兵部尙書銜以行三年召還總兵金聲桓劾之獬擅加副將高進庫劉一鵬總兵銜市恩構毀之獬議撫諸將懷觀望不力攻贛州之獬疏辨下兵部議奪之獬官四年土寇復攻淄川之獬佐城守城破死之諸係從死者七人下吏部議卹侍郎陳名夏金之俊議復之獬官予卹馬光輝及啟心郎甯古里議之獬已削籍不當予卹兩議上命用光輝議李若琳山東新城人

明天啟進士授檢討順治元年起原官累遷少詹事兼國子監祭酒詹事府裁改翰林院侍讀學士兼祭酒如故二年請更定孔子神牌復元制曰大成至聖文宣王下禮部議定稱大成至聖先師再遷禮部侍郎五年進尙書六年加太子太保既能歸未幾卒

陳名夏字百史江南溧陽人明崇禎進士官修撰兼戶兵二科都給事中降李自成福王時入從賊案順治二年詣大名降以保定巡撫王文本薦復原官入謁睿親王請正大位王曰本朝自有家法非爾所知也旋超擢吏部侍郎兼翰林院侍讀學士師定江南九卿科道議南京設官名夏言國家定鼎神京居北制南不當如前朝稱都會設官如諸行省疏入稱旨三年居父喪命奪情任事請終制賜白金五百暫假歸葬仍給俸贍其孳在京者五年初設六部漢尙書授名夏吏部尙書加太子太保八年授弘文院大學士進少保兼太子太保名夏任吏部時滿尙書譚泰阿睿親王擅權名夏附之亂政睿親王薨是夏御史張煊劾名夏結黨行私銓選不公下王大臣會鞫譚泰祖名夏坐煊誣奏論死

語詳煊傳是時御史盛復選亦以劾名夏坐黜迨秋譚泰以罪誅九年春復命王大臣按煊所劾名夏罪狀名夏辨甚力及屢見詰難詞窮泣訴投誠有功冀貸死上曰此輟轉矯詐之小人也罪實難逭但朕已有旨凡與譚泰事干述者皆赦勿問若復罪名夏是爲不信因宥之命奪官仍給俸發正黃旗與閒散官隨朝諭令自新十年復授秘書院大學士吏部尙書員缺侍郎孫承澤請以名夏兼攝上責承澤以侍郎舉大學士非體翼日命名夏署吏部尙書上時幸內院恒諭諸臣滿漢一體毋互結黨與名夏或強辭以對上戒之曰爾勿怙過自貽伊戚諸大臣議總兵任珍罪皆以珍擅殺其孥怨望宜傳重比名夏與陳之遴金之俊等異議坐欺蒙論死復寬之但鑄秩削俸任事如故十一年大學士宥完我劾之略言名夏屢蒙赦宥尙復包藏禍心嘗謂臣曰留髮復衣冠天下卽太平其情叵測名夏子掖臣居鄉暴惡士民怨恨移居江甯占入官園宅關通納賄名夏明知故縱名夏署吏部尙書破格擢其私交趙企先給事中郭一鶚疏及之名夏欲加罪以劉正宗不平而止浙江道員史儒綱爲名夏姻家坐

事奪官逮問名夏必欲爲之復官給事中魏象樞與名夏姻家有連坐事應左遷僅票劄俸護黨市恩於此可見臣等職掌票擬一字輕重關係公私立簿注姓以防推諉名夏私自塗抹一百十四字上命誥誥科道官結黨名夏擅加抹改其欺罔類是請勅大臣鞠實法斷施行疏下廷臣會鞠名夏辨諸欵皆虛惟留髮復衣冠實有其語完我與正宗共證名夏諸罪狀皆實讞成論斬上命改絞掖臣逮治杖戍

陳之遴字彥升浙江海寧人明崇禎進士自編修遷中允順治二年來降授秘書院侍讀學士五年遷禮部侍郎六年加右都御史八年擢禮部尚書御史張煊劾大學士陳名夏語涉之遴鞠不實免議加太子太保九年授弘文院大學士時捕治京師巨猾李應試王大臣會鞠之遴默不語王大臣詰之之遴曰上立置應試於法則已如或免死則必受其害是以不言王大臣等以聞上以詰之遴疏引罪上以之遴既悔過宥之調戶部尚書議總兵任珍罪與名夏及金之俊持異議坐罪寬貸如名夏十二年奏請依律定滿臣有罪籍沒家產降革

世職之例下所司議行復授弘文院大學士加少保兼太子太保十三年上幸南苑召諸大臣入對諭之遴曰朕不念爾前罪屢申誥誠警以朕言告人乎抑自思所行亦曾少改乎之遴奏曰上教臣臣安敢不改特臣才疏學淺不能仰報上恩上曰朕非不知之遴等朋黨而用之但欲資其才故任以職且時時教飭之者亦冀其改過效忠耳因責左副都御史魏裔介等媢阿緘默裔介退具疏劾之遴植黨營私當上詰問但云才疏學淺良心已昧並言之遴諷禮部尙書胡世安舉知府沈令式旋爲總督李輝祖所劾是爲結黨之據給事中王植又劾之遴市權豪縱昨蒙詰責不思閉閣省罪卽於次日遽游靈佑宮逍遙恣肆罪不容誅之遴疏引罪有云南北各親其親各友其友上益不懌下吏部嚴議命以原官發盛京居住是冬復命回京入旗十五年復坐賄結內監吳良輔鞫實論斬命奪官籍其家流徙尙陽堡死徙所

劉正宗字可宗山東安邱人明崇禎進士自推官授編修福王時授中允順治二年以薦起國史院編修累遷秘書院學士十四年授吏部侍郎擢弘文院大

學士吏部尙書缺員諭以正宗清正耿介堪勝此任加太子太保管吏部尙書御史楊義論部推越次正宗與辨執相詬旨給事中周曾發御史姜圖南祖建明交章劾之御史張嘉復以正宗昏庸衰老背公徇私疏請罷斥下部議以無實據寢其事給事中朱徽復劾正宗擅擬僉事許宸遷通政司參議不由會推又未專疏題明正宗以疎忽引咎當劾俸援恩詔以免旋引疾乞休不允辭尙書命以兼銜回內院加少保兼太子太保十四年考滿進少傅兼太子太傅十五年改文華殿大學士十六年上以正宗器量狹隘終日務詩文廷議輒以己意爲是降旨嚴飭並諭曰朕委任大臣期始終相成以愜簡拔初念故不忍加罪時加申戒當痛改前非稱朕優容寬恕之意十七年自陳乞罷不允左都御史魏裔介劾正宗自陳奏內不敘上諭切責無人臣禮李昌祚叛案有名票擬內升先後薦董國祥梁羽明今皆事敗被劾不自檢舉欺君之罪何辭正宗與張縉彥爲友縉彥序正宗詩曰將明之才詭譎尤不可解正宗弟正學爲鄭成功總兵正宗屬巡撫耿燁躡升中軍盭國亂政其事非一端請乾斷以杜禍萌

御史季振宜繼劾亦及國祥正學並正宗貪賄營利諸事正宗疏辨略謂李昌祚爲叛黨裔介身爲法司何不早行糾參例凡薦舉之官在本任不職追坐舉主國祥羽明皆升任後得罪籍彥序臣詩有曰將明之才臣詩稿見存籍彥序未見此語疏入上奪正宗官下王大臣會鞠亦責裔介振宜不早糾參并奪官待質旋議上裔介振宜劾正宗罪狀鞠實者十一事罪當絞上斥正宗性質暴戾器量偏淺持論偏私處事執謬惟事沾名好勝罔顧大體罪戾滋甚從寬免死籍家產之半入旗不許回籍十八年聖祖卽位以世祖遺詔及正宗罪狀當置重典懲其衰老貸之未幾病卒張籍彥河南新鄭人明崇禎進士自知縣行取授主事再授編修擢兵部尙書順治元年詣固山額真葉臣軍前納款福王授以總督乃遁去旣復受洪承疇招降九年以薦下吏部考核十年授山東右布政十五年擢工部侍郎十七年甄別三品以上大臣降授江南徽寧道裔介劾正宗詞連籍彥奪官逮訊御史蕭震疏劾籍彥編刻無聲戲自稱不死英雄感人心害風俗王大臣會鞠論斬上命賁死籍其家流徙寧古塔尋死於戍所

論曰剛林相太宗與范文程希福並命祈充格掌記室於創業宜皆有功銓故明相諳故事與名夏皆善占對名夏勸進雖不用以此邀峻擢之遵正宗各有所援引知當時亦頗用事際初連都高位而不足以堪之誅夷削奪曾莫之惜正宗傾名夏亦不免於罪尤可鑑矣

清史稿

列傳三十三

譚泰

何洛會

錫圖庫

博爾輝

冷僧機

譚泰舒穆祿氏滿洲正黃旗人揚古利從弟也初授牛錄額真天聰八年擢巴
牙喇章京與固山額真圖爾格分統左右翼兵略錦州還從太宗伐明自上方
堡毀邊牆以入敗明兵克保安州擢巴牙喇章京令關白諸事九年揚古利
賜第侍衛宗室濟馬護欲得其舊居揚古利不可濟馬護屬譚泰入奏譚泰匿
不以聞濟馬護訴於上上責譚泰曰爾爲朕耳目凡事當無隱濟馬護乃朕叔
父之子其言尙不能達民間勞苦嗟怨何由得使朕知爾恃宗族強盛欺陵愚
弱朕所深惡下刑部質訊奪官尋復授本旗固山額真崇德元年從武英郡王
阿濟格等伐明克延慶等十二城進圍定興先登有功復與固山額真阿山等
設伏敗明遊化三屯營守兵盡殲之師還宴勞復從上伐朝鮮朝鮮王棄城走

譚泰率師入其城盡收其輜重從上遂朝鮮王至南漢城受降而還四年從睿親王多爾袞等伐明與固山額真葉臣自太平寨破青山口與明兵十三戰皆捷輔國將軍鞏阿岱濟馬護兄也譚泰與相詬於禁門坐罰六年從圍錦州譚泰將四百人自小凌河直抵海濱絕明兵歸路與明總督洪承疇兵戰大敗之授世職二等參將七年從輔國公篇古等攻薊州擊敗明總兵白騰蛟白廣恩等俘馘爲諸軍最八年命率銳卒與固山額真準塔更番戍錦州順治元年從入關遂破李自成於慶都復將巴牙喇兵躡擊至真定大破之敍功授一等公睿親王攝政譚泰與巴牙喇章京圖賴啓心耶索尼並見信任固山額真何洛會誣肅親王豪格怨譚泰等不附已許之睿親王王謂譚泰忠益信任之大學士希福忤譚泰希福欲易賜第譚泰不可希福誚之益怒其弟譚布以希福述睿親王自言過誤告譚泰譚泰許之法司希福坐黜二年英親王阿濟格坐奏軍事不實得罪命譚泰與熬拜等集衆宣其罪譚泰匿諭旨不以示衆索尼發其罪降世職昂邦章京奪官譚泰怨索尼許索尼於內庫牧馬鼓琴及禁門

橋下捕魚索尼亦坐黜譚泰復起爲本旗固山額眞初師下江南譚泰自西安逐捕流寇慮不與平江南功使謂圖賴曰我軍道迂險後至今南京未下請留待我軍圖賴書告索尼使啓睿親王或發觀之懼譚泰得罪毀其書勿使達索尼圖賴師還詰索尼發其事王鞠齋書者得狀譚泰又坐與婦翁固山額眞阿山遣巫者治病下廷臣議罪論死下獄王使視之並餽食焉譚泰曰王若拯我我殺身報王乃出之獄五年復原官金聲桓叛江西授譚泰征南大將軍率師討之聲桓以步騎七萬人抗我師譚泰督諸軍與戰次九江大敗聲桓兵獲其舟以濟師攻南昌爲長圍困之數月麾將士以雲梯登聲桓中二矢投水死又破其將王得仁南康瑞州臨江袁州並下當聲桓叛時李成棟以廣東應之南昌圍急成棟赴援譚泰師將至贛州聞成棟入信豐譚泰遣諸將乘勝襲擊成棟兵潰溺水死克信豐別將徇撫州建昌江西悉平師還授一等精奇尼哈番七年睿親王薨上命吏刑工三部增設滿洲尙書各一授譚泰吏部尙書八年世祖親政追論睿親王罪狀大學士剛林所充格皆坐誅罪不及譚泰時圖賴

已卒索尼方罪廢譚泰毀圖賴墓室洩舊忿五月御史張煊劾大學士陳名夏等下王大臣會鞫譚泰袒名夏讞上命未下譚泰前奏言煊劾皆虛且所舉諸事皆在赦前煊以外轉嫌誣名夏等死罪當反坐煊遂見法譚泰愈縱恣岳爾多其妻弟也襲一等精奇尼哈番爲奪其族人法喀應襲一等阿思哈尼哈番合併爲三等侯佟圖賴其女弟之夫也時金礦駐防杭州妄稱員缺以佟圖賴擬補上自譚泰袒陳名夏構張煊心厭惡之是歲八月下之詔責其專橫命執付獄集廷臣議罪熬拜復許譚泰阿附睿親王及營私擅政諸狀讞皆實王大

臣議誅譚泰及其子孫上命誅譚泰籍其家子孫貸連坐

何洛會失其氏滿洲鎮白旗人父阿吉賴事太祖從征戰官牛象額真卒何洛會嗣兼巴牙喇甲喇章京天聰八年從伐明略錦州九年詔免諸功臣徭役何洛會與焉崇德五年授正黃旗蒙古固山額真從睿親王多爾袞伐明圍錦州調滿洲固山額真七年錦州既下追論圍錦州時何洛會匿鄂羅塞臣破陳功當奪官上宥之何洛會隸肅親王豪格頗見任使世祖卽位睿親王攝政與肅

親王有隙何洛會訐肅親王與兩黃旗大臣揚善俄莫克圖伊成格羅碩將謀亂肅親王坐削爵揚善等皆棄市賞何洛會告姦籍俄莫克圖伊成格家畀之授世職二等甲喇章京尋從睿親王入關擊李自成遂至慶都還睿親王令奉表迎世祖摺內大臣留守盛京阿哈尼堪將左翼碩詹將右翼並於雄耀城錦州寄遠鳳凰城興京義州新城牛莊岫巖城各置城守官皆統於何洛會二年敘功進世職一等旋命率師駐防西安道河南討定西平土寇劉洪起等是歲十二月授定西大將軍命自陝西徇四川時自成將劉體純等犯商州叛將賀珍與其黨孫守法胡向宸等分據漢中興安三年珍以七萬人犯西安何洛會督兵迎戰珍敗走復逐破之並破體純商州肅親王從入關破李自成復爵至是上命爲靖遠大將軍下四川召何洛會還京師四年命率師駐防宣府仍授正黃旗滿洲固山額真五年調鎮白旗命佐譚泰定江西擊破金聲桓王得仁李成棟事具譚泰傳師還賜所獲金銀珠玉進世職三等精奇尼哈番肅親王師還貝子屯齊等許王諸悖妄狀何洛會復從而證之遂坐奪爵以幽繫終睿

親王取肅親王福金召肅親王諸子入府校射何洛會嘗之曰見此鬼魅不覺心悸尚書譚泰聞其語及睿親王薨世祖親政何洛會語貝子錫翰曰兩黃旗大臣與我相惡我嘗許告肅親王今豈肯容我八年二月蘇克薩哈等許睿親王將率兩白旗移駐永平且私具上服御及薨用斂何洛會羅什博爾惠等皆知狀時羅什博爾惠已先誅執何洛會下王大臣會鞫譚泰錫翰各以何洛會語告又追論誣告肅親王罪與其兄胡錫並磔死籍其家

錫圖庫烏札拉氏滿洲正白旗人世居烏拉兄福蘭當太祖時來歸授世職備禦卒錫圖庫圖授牛錄額真兼巴牙喇甲喇章京天聰四年師克永平錫圖庫與甲喇額真圖魯什等率兵循微得遼卒二馬十七五年嗣敵大凌河得二人以還上伐明圍大凌河城敗錦州援兵錫圖庫皆有功六年復從伐明略宣府大同邊外多所斬獲八年復略蒙古錫爾哈錫伯圖諸地斬七十餘級俘百餘戶及馬駝資以所獲進世職一等甲喇章京九年偕噶布什賢噶喇依昂邦勞薩等略明邊入長城攻代朔諸州多所斬獲崇德元年睿親王多爾袞率師伐

明攻齊遠錫圖庫以二十人前驅至中後所及山海關外訓敵屢得避卒并獲其馬又於前屯衛設伏敗敵喀木尼堪部葉類等盜科爾沁諸部馬叛走錫圖庫率巴牙喇壯達八人詣寧古塔與梅勒額真吳巴海督兵追之行數十日及於溫鐸招降不從葉類潛遁盡殲其黨九十四人俘婦女八十餘得馬五十六復逐捕葉類入山射之殘師還上遣大臣出迎五里宴勞進世職一等梅勒章京五年命偕巴牙喇蠡章京濟什哈率師並徵蒙古敖漢李曼烏喇特諸部兵伐索倫部敗敵於甘河擒部長博木博郭爾籍千餘戶得馬數百師還賜宴北驛館進世職三等昂邦章京旋授本旗梅勒額真七年從貝勒阿巴泰伐明白薊州越明都下山東師還以先出邊部議當奪官命寬之削白金百八年擢巴牙喇蠡章京順治元年從睿親王多爾袞伐明敗李自成將唐通於一片石遂入山海關屢戰皆勝敗自成游騎於三河迫擊至安肅旋從固山額真葉臣等取太原戰於汾州於絳州屢破敵二年進二等精奇尼哈番時自成猶據陝西師自潼關綏德南北兩路入錫圖庫率師與北路軍會敗賊延安自成走入湖

廣錫圖庫移兵從之自安陸至於荆門屢擊敗自成兵三年復從肅親王豪格下四川討張獻忠五年進世職一等復從鄭親王濟爾哈朗下湖南六年師次長沙錫圖庫從左翼巴牙喇薙章京努三率兵前驅攻湘潭努三軍北門錫圖庫軍西門遂克之進徇永興斬明將尹舉智杜貞明等再進定寶慶取全州破明將焦璉又移兵克永安關取道州師還賜白金三百七年睿王親多爾袞薨八年春吳拜洛什博爾輝等訐英親王阿濟格將謀亂勅實錫圖庫坐與謀誅死籍其家

博爾輝他塔喇氏滿洲正白旗人初以巴牙喇壯從征棟全部有俘馘天聰三年從太宗伐明自龍井關入攻遵化明總兵趙率教自山海關赴援與戰博爾輝斬其副將明兵驚潰五年擢巴牙喇甲喇章京兼戶部參政復從伐明與明兵遇甯遠擊殺前隊七人八年復從伐明攻大同明兵三千自龍門迎戰博爾輝與噶布什賢章京錫特庫牛彖額眞星訥等奮擊破之九年命偕承政馬福塔齋敕諭朝鮮國王師出邊招察哈爾部衆自歸化經明邊東還博爾輝殿

明兵二百三十追擊我師博爾輝以二十人擊卻之斬十人俘一人得馬三
兵從我師有垂爲所獲者博爾輝救之得脫崇德元年敘功授世職牛象章京
三年裁參政專任巴牙喇甲喇章京順治元年兼任刑部理事官從入關擊李
自成敘功進世職二等甲喇章京旋署巴牙喇章京從順承郡王勒克德渾
下湖廣師至武昌時自成將馬進忠王進才既降復叛據岳州令博爾輝率師
討之次臨湘擊敗其兵進攻岳州進忠進才走長沙遂擊敗之其將黑運昌以
舟師降師還優賚五年貞除巴牙喇章京列議政大臣進世職二等阿思哈
尼哈番睿親王攝政諸王多與忤鄭親王濟爾哈朗降郡王旋復爵初以端重
親王博洛敬謹親王尼堪佐理事亦以專擅降爵博爾輝及諸大臣羅什額克
親吳拜蘇拜皆謹事睿親王從王獵喀喇城王薨喪還英親王阿濟格爲睿親
王同母兄欲繼王柄政博爾惠等與阿爾津共發其罪英親王奪爵幽禁賞諸
告者博爾惠進世職二等精奇尼哈番博爾惠等傳睿親王遺言復理事二王
親王爵以告兩黃旗大臣居月餘命未下博爾輝有疾穆爾泰往視之博爾輝

以爲言穆爾泰吉額爾德赫額爾德赫告敬謹郡王尼堪遂與端重郡王博洛訴於鄭親王八年正月復二王府越八日執博爾輝等下獄坐博爾輝羅什勳搖國事蠱惑人心論死籍其家額克親削宗室籍及吳拜蘇拜皆奪官爲民議上得旨朕每聞刑人殊不忍二人罪當誅姑宥死何如王大臣復以初議上乃誅死

冷僧機納喇氏滿洲正黃旗人葉赫部長金台吉之族也葉赫亡來歸隸正藍旗屬貝勒莽古爾泰天聰元年赦漢部長索諾木來歸尙公主爲額駙以冷僧機隸焉莽古爾泰既卒九年冷僧機詣法司言莽古爾泰及貝勒德格類與公主及索諾木結黨設誓謀不軌冷僧機與甲喇額眞屯布祿巴克愛巴禮並下法司鞫實冷僧機以自首免罪屯布祿愛巴禮皆坐誅籍其家以畀冷僧機改隸正黃旗授世職三等梅勒章京崇德二年固山額眞都類坐事下兵部待鞫兵部參政穆爾泰令諸在繫者避都類或以告冷僧機聞於上穆爾泰及同官皆坐降劄授冷僧機一等侍衛七年祖大壽來歸上幸牧馬所命內大臣侍衛

與大壽等校射中的者有所賜冷僧機得駝一世祖即位授內大臣順治二年進二等阿思哈尼哈番兼拖沙喇哈番譚泰訐案尼引冷僧機爲證謝未聞坐徇庇當削世職籍沒上貫之旋進世職三等精奇尼哈番七年睿親王有疾怨上未臨視冷僧機及貝子錫翰等奏請上臨視睿親王坐以擅請降世職恩詔復故進一等伯睿親王薨以豫親王多鐸子多爾博爲後襲爵冷僧機言於上曰昔太宗登遐黃旗大臣誓立肅親王睿親王定策奉上紹統多爾博宜特見優遇又舉侍衛羅什羅什上爲冷僧機乞恩八年鄭親王濟爾哈朗等劾羅什盡惑諸王坐誅辭連冷僧機上因命諸大臣詰誓立肅親王事冷僧機窮詰大臣兼發阿諛睿親王諸罪論斬籍沒命寬之九年追論冷僧機與貝子鞏阿岱錫翰內大臣西訥布庫等迎合睿親王亂國政下王大臣勦實與鞏阿岱錫翰西訥布庫等並誅籍其家

論曰定金聲桓王得仁之亂譚泰專將何洛會爲之佐錫圖庫博爾輝亦久從征戰有勞睿親王既薨諸阿附者乃互相傾何洛會之獄譚泰證之錫圖庫之

誅博爾輝等發之轉相排軋同就誅夷若冷伯機者專事告許其及也亦宜矣

清史稿

列傳三十四

彭而述

陸振芬

姚廷著

畢振姬

方國棟

于朋舉

王天鑑

趙廷標

彭而述字子鏡河南鄧州人明崇禎進士官陽曲知縣母憂歸順治初英親王徇湖廣薦爲提學僉事遷永州道參議孔有德定湖南薦而述授貴州巡撫予兵三千以行次靖州降將陳友龍叛圍州城而述夜開西門出營山下選勁騎乘霧衝陳賊潰且走副將賀進才戰死城兵大噪欲與友龍合而述拔衆退守寶慶告有德益師與賊相持紫陽河上永州陷劾免官久之以尙書王永吉薦命赴經略洪承疇長沙軍前陳黔楚山川形勢戰守方略甚悉承疇異之補衡州兵備道副使尋令管雲南右布政事調廣西桂林道參政極曾莫扶約衆衆劫永寧而述用始龍故土司覃法歐爲鄉導檄永寧知府史贊勳募土兵數百

人遣裨將分道進敗扶豹於酉山又敗於麻岡擒之擢貴州按察使吳三桂征水西土司安坤而述謀曰烏蒙烏撒鎮雄東川四府與水西爲唇齒土司隴安藩又與安氏婚媾今四府雖名內附狼子野心勢必顧惜其種類以水西之強而安藩與四府附之安坤未易制也莫如先定四府戡安藩然後西南可無患三桂用其策誅安坤邊廣西右布政使三桂薦爲雲南左布政使而述乞歸三桂留之會有詔召遂行出會城三十里一夕無疾卒

陸振芬字令遠江南華亭人順治六年進士時兩粵未平廷議破格用人卽新進士中選才除道府振芬授廣東惠潮道副使從師南征是冬克南雄七年春度大庾嶺次韶州韶州以南望風降進規會城既下振芬與總兵郭虎率師赴惠州剿撫歸善海豐諸寨將至諸寨窺兵寡出拒振芬選精銳數百人繞出其旁擊之獲一隊諸寨皆懼於是諭以禍福降者踵至至海豐守者抗不下振芬與虎駐五坡驛他將自羊躡嶺會師合攻之遂克其城碣石衛亦降八年抵潮州上官聯結諸鎮檢制土官招集流亡簡省徭役民始有更生之樂亂甫定用

法嚴郡縣輒濫禁無辜振芬與屬吏約期五十日清庶獄囹圄爲空九年會師復平遠總兵郝尙久故降將陰持兩端聞將改授水師副總兵結山海諸寇僭立帥府振芬牒大吏策弭變不應十年春尙久自署新泰侯舉兵圍道署振芬諭以大義不從使告變秋固山兵至振芬約爲內應引外兵入誅尙久事平引疾歸里家居四十年乃卒

姚延著字象懸浙江烏程人順治六年進士除廣西慶遠知府從師南征調柳州有守禦功又調平樂遼廣東嶺南道副使撫種寨擢江南按察使十六年鄭成功內犯陷鎮江入攻江甯延著佐總督耶廷佐繕守備安輯危城間閭不擾民間時有羊尾黨事發株連數百人延著謂廷佐曰寇在門不可與大獄搖人心獄乃解當事急人多疑貳民間有宿怨輒誣以通敵延著嚴治反坐者多所全活城民有升高而望者避者執之總管喀喀木以爲敵諜延著力爭得不死喀喀木部兵擾城市延著捕得械斃之吏卒私掠被難婦女延著親駐江干召其家遣還者一千七百人以此忤喀喀木事定敘功擢河南左布政使旋以憂

歸而金壇獄起鎮江之陷也屬縣戒嚴金壇知縣任體坤集縣中士大夫王重
袁大受等謀遣諸生十輩詣鎮江乞糧兵丹徒亂民王再興兵起復令書吏耆
民數十人送款盡竊庫帑以遁喀喀木等擊敗成功體坤乃復至縣賂重大受
謁大吏謂士民送款冀掩棄城罪重大受居鄉多不法爲諸生所撓至是欲以
叛坐諸生洩私怨列姓名以上巡按馬勝聲疏聞下廷佐令延著鞫其獄延著
繫縣吏李鍾秀訊得實欲但坐體坤餘皆減罪大受騰書京師爲蜚語欲並陷
延著御史馮班發其狀時侍郎尼滿奉詔勘提督馬逢知獄命卽訊乃坐重大
受及諸士大夫集議者諸生及書吏耆民送款者皆斬體坤以被逼迫減爲絞
巡按何可化又疏劾延著讞從叛罪人史記青管得勝傳輕比又有王天福韓
王錫并縱不擬罪與金壇獄並論亦坐絞時喀喀木主軍事新破敵尤威重素
不嫌於延著民間謂延著之死喀喀木實主之就刑日江寧爲罷市士民哭踊
喪歸數百里祭奠不絕建祠雞鳴山下私祀焉子瀄燾康熙六年進士授內閣
中書舍人伏闕上書爲延著訟冤累擢湖廣提學道僉事坐事罷未行值叛卒

夏逢龍之亂誓死不爲屈事聞復官授岳常澧道副使卒

畢振姬字亮四山西高平人順治三年進士授平陽教授入爲國子監助教累遷刑部員外郎曹事暇獨坐陋室布被瓦盆讀書不稍倦十年出爲山東濟南道參議歲旱流民踞山谷爲盜振姬晝夜馳三百里往諭之悉就撫全活者七千餘人泰山香稅歲羨餘七千金例充公使錢振姬悉以佐餼調廣東驛傳道僉事時三藩使命往來絡繹胥吏乘以私派折價民苦之振姬一繩以法閱數月減船數百減費七萬有奇調浙江金衢嚴道參政擢廣西按察使所至以廉能聞遷湖廣布政使乞病歸康熙中詔舉博學鴻儒左都御史魏裔介副都御史劉綬疏薦之十八年命廷臣舉清廉吏裔介復疏言振姬清操絕世才略過人請告十餘年躬耕百畝讀書不輟綬亦言振姬居官不染一塵歸日一僕一馬了無長物眞學行兼優之人下部議以振姬老置勿用尋卒

方國棟字千符順天宛平人順治三年舉人授蠡縣教諭入爲國子監助教累擢至刑部郎中十六年出爲廣東海北道僉事海寇鄧耀居島中時出剽掠國

棟以三千人分五道進剿檄隣道出兵扼要隘擒耀解散餘黨事平雷廉兩部諸富人爲賊所誣械繫者衆國棟察其寃爲辨雪諸富人喪千金爲報國棟曰吾憫若無辜奈何汙我卻之遷山西寧武道參議康熙六年裁缺改江南蘇松常道參議太湖隄岸傾圯率吏民修葺沿海墩臺及吳淞劉河兩牯工費不擾民師下閩粵徵調旁午國棟一意與民休息每遇急徵從容部署芻茭糧糗預儲以待軍興無乏閭左晏然戒屬吏無朘民郡縣稍稍知斂戢不敢事剝削而已議開於今日已無可加當議節自朝廷始舊制江南歲市布五萬匹供宮府資予宜可罷歲省帑金三萬議上報可滿洲兵駐防蘇州議築營舍於王府基當城中國棟以兵民雜居難久安持不可乃改營南城隙地民便之宜興善權山中寺僧與豪族爭地聚衆焚寺殺僧知縣告亂大吏將發兵國棟單騎馳往得首禍寘法餘無所問吳俗健訟喜投訴告密國棟輒不問即有所案亦從寬馭吏嚴而拊循士民具有恩意十六年卒吳氏思之建祠虎邱山麓以祀

于朋舉字襄子江南金壇人順治六年進士改庶吉士散館授檢討十二年出爲河南睢陳道副使政不擾民鄆城盜殺縣官而逸士民洶洶謂城將受屠朋舉馳至撫諭毋恐營將以兵至拒不使入城大吏召朋舉詰責對曰鄆城令朋舉婦翁也豈不欲甘心是盜獨柰何苦良民大吏悟止兵亦得盜正其罪遷福建福寧道參政興化瀕海鎮將所部皆羣盜受撫者有材官辱張氏僕張氏以告鎮將撻材官部卒大譁毀張氏之室欲刦鎮將爲亂鎮將避去則縊被撻者寅張氏謂其僕殺之朋舉甫到官廉得首惡猝縛至集文武吏會鞠健兒帶刀環立顧視朋舉從容曰若曹干軍法罪重念若曹約束無素但用殺人律罪有專屬衆乃泥首言殺人者爲張氏僕朋舉曰若曹氣餒何等彼能於千百健兒中奪一人縊之耶召訊證者俱吐實誅三人而事定泉州提督剿海盜盜逸入興化界鎮將獲數百人朋舉視其鬻髮者曰此良民被陷當宥有年少者曰童穉何知又當宥全活甚衆鄭成功屯廈門與漳州隔海相望固山額眞駐會城遣兵戍漳州番代歲四易民苦供役朋舉請駐防無屢更不許固請展其期

歲再易民稍蘇息擢四川按察使山東右布政使父曼歸起授湖南布政使上官見胥吏至數百曰兵初罷民方重困此曹鮮衣美食縱橫市井問何所取諸汰其十九擇謹愿者取足供文書而已數爲大吏言地方利病有司賢不肖積與之忤被劾鐫級未行而大吏以貪敗士民惜之尋卒

王天鑑字近微直隸萬全人順治三年進士授山東恩縣知縣縣接直隸界自明季爲盜藪嘗一歲七被寇天鑑上官諭父老曰往歲寇至縣輒不守由人無固志自今勿復逃視知縣所向俄而寇大至天鑑坐城上從容指揮寇疑有伏遂巡去於是葺樓櫓治城隍嚴候望時巡徼守具大備按行鄉鄙舉團練立砦十有九枹鼓相聞久之得步卒萬八千騎士三百巡按御史疏聞令天鑑自治兵廉得境內賊渠數輩夜突至其鄉呼之出賊錯愕不能遁皆誅之寇據曹縣巡撫檄天鑑與諸道兵會剿率所部爲前鋒冒矢石深入諸軍踵之復其城嘗以輕騎逐賊日暮被圍短兵相接手格殺數賊潰圍出不失一騎在恩四年屢與寇戰敵無算降者安撫之寇遠遁招徠屯種流亡復歸墾荒千八百頃建

書院紘誦不輟政聲爲山東最上考內遷禮部主事十一年始行藉田親耕禮
天鑑參酌古今悉合禮宜累遷郎中主山東鄉試十二年出爲陝西河西道參
議與屬吏約毋獵民枉法天鑑固長治兵按籍討軍實誠將弁毋以軍精肥私
橐性剛介負氣數忤上官歲餘謝病歸絕跡公府門下士或有餽遺不受曰飭
篋簋惜名節足以報舉主矣康熙初大臣薦不出尋卒

趙廷標浙江錢塘人順治三年以拔貢生授福建永定知縣廣東大埔逸寇江
龍以萬餘人犯縣城廷標城守寇穴地入瀦池水以待地曠不得發樹雲梯乘
城於城上懸柵墮之持三月食垂盡值立春廷標張鼓樂開城門迎春東郊寇
疑有伏引去密遣兵間道往伏兩山間出不意夾擊敗之進至龍磔寨捕斬略
盡擄湖廣衡州同知署府事獨賦擊荒流亡復業歲大饑賑卹有實惠經略大
學士洪承疇薦廷標十七年擢雲南迤東道副使安普諸番爲土官所誘競作
不靖廷標設方略行間解散之遂復維摩舊地移檄諭甯州彌勒巴盤八甸罷
捕逐之令令諸持田器者皆爲良民持兵者乃爲賊巡行安撫諸路悉平治迤

東十八年康熙中調廣東廣肇南韶道副使安普民蠻聞其去暫道塞城留之
慰諭再三乃得行兩粵八排諸山寇聞廷標來望風解散連州亂至立就撫諭
年以髮去起湖南驛鹽道副使捕治刺寇誅其渠餘悉縱歸農湖南方用兵芻
茭械仗儲峙供給不誤督刻民不困役兼攝糧道會湘東民變巡撫韓世琦令
廷標往撫之單騎馳諭皆悔泣聽命散遣之事稍定修嶽麓書院置田廩諸生
管行部至衡州父老羅拜車下號以慈母俄遷陝西糧儲道參議已病值武昌
兵變軍書至猶強起視事病篤乞歸至家卒

論曰自置督撫而兩司權輕况於各道然以賢者處之奉職循理視民之所急
弭亂解饒亦足以爲治而述振芬振姬天鑑皆有才略根本尤在廉勤延著國
棟廷標當治亂用重之日濟之以寬仁雖以是罷貶甚或中危法而一不自恤
是皆能舉其職者澤及於斯民亦已多矣